


柳田文庫
文庫11
D 297
5



文庫 11
D 297
5

遼史卷四十八

元中書右丞相總裁托克托等修
志第十七下

百官志四

烏江文庫

南面京官

遼有五京上京為皇都凡朝官京官皆有之餘四京隨
宜設官為制不一大抵西京多邊防官南京中京多財
賦官五京並署者列陳之特置者分列于後
三京宰相府職名總目

左相

右相

左平章政事

右平章政事

柳田文庫

010190566442

東京宰相府聖宗統和元年詔三京左右相左右平章

事

中京宰相府

南京宰相府

諸京內省客省職名總目

某京某省使

某京某省副使耶律博諾原作蒲奴開泰末為上京內

客省副使

上京內省司

東京內省司地理志東京大內不置宮嬪唯以內省使

副判官守之

五京諸使職名總目

某京某使王棠重熙中為上京鹽鐵使

知某京某使事張孝傑清寧間知戶部使事

某京某副使劉仲重熙中為三司副使

同知某京某使事道宗太康三年見托卜嘉原作搃不

也同知度支使事

某京某判官聖宗太平九年見戶部使判官

上京鹽鐵使司

東京戶部使司

中京度支使司

南京三司使司

南京轉運使司亦曰燕京轉運使司

西京計司

五京留守司兼府尹職名總目

某京留守行某府尹事聖宗統和元年見上京留

守行臨潢尹事吳王舒原作

某京副留守天祚天慶六年見東京副留守高濤

臣

知某京留守事蕭惠開泰二年知東京留守事

某府少尹聖宗太平四年見臨潢少尹鄭宏節

同知某京留守事太平八年見中京同知耶律頁

原作

同簽某京留守事蕭迪里原作太平六年同簽南

京留守事

某京留守判官室昉天祿中為南京留守判官

某京留守推官聖宗開泰元年見中京留守推官

李可舉

上京留守司

東京留守司

中京留守司太宗大同元年命趙延壽為中京留守治

鎮州聖宗統和十二年命室昉為中京留守

治大定府

南京留守司太宗天顯三年升東平郡為南京治遼陽

十三年以幽州為南京治析津聖宗開泰元

年改幽都府為析津府

西京留守司

五京都總管府職名總目

某京都總管知某府事

同知某府事聖宗太平五年見同知中京事蕭雅

原作

上京都總管府

東京都總管府
中京都總管府
南京都總管府
西京都總管府
五京都虞候司職名總目
都虞候
上京都虞候司
東京都虞候司
南京都虞候司
西京都虞候司
中京都虞候司
五京警巡院職名總目
某京警巡使

某京警巡副使
上京警巡院
東京警巡院
中京警巡院
南京都警巡院
西京警巡院
五京處置使司職名總目
某京處置使
上京處置司
東京處置司
中京處置司
西京處置司
南京處置司

五京學職名總目道宗清寧五年詔設學養士頒經及傳疏置博士助教各一員

博士

助教

上京學上京別有國子監見朝官

東京學

中京學中京別有國子監與朝官同

南京學亦曰南京太學太宗置聖宗統和十二年賜水

禮莊一區

西京學

已上五京官

上京城隍使司亦曰上京皇城使

上京城隍使韓德讓景宗時為上京城隍使

東京渤海承奉官聖宗開泰八年耶律巴格原作哥奏渤海承奉班宜設官以統之因置

渤海承奉都知押班

遼陽大都督府太宗會同二年置

遼陽大都督會同二年都督和勒博原作曷魯泊等關

防遼陽東都

東京安撫使司

東京安撫使

東京軍巡院地理志東京有歸化營軍千餘人籍河朔亡命於此置軍巡院

東京軍巡使

中京文思院

中京文思使馬人望父佺為中京文思使

中京路按問使司

中京路按問使耶律和尚重熙二十四年為中京路按問使

中京巡邏使司

中京巡邏使耶律古雲原作古昱開泰間為中京巡邏使

中京大內都部署司

中京大內都部署聖宗開泰元年見中京大內都部署

中京大內副部署

南京宣徽院

南京宣徽使道宗壽隆元年見宣徽使耶律特默原作特未

知南京宣徽院使事

知南京宣徽院事

南京宣徽副使

同知南京宣徽院事

南京處置使司聖宗開泰元年見秦王隆慶為燕京管內處置使

燕京管內處置使

南京侍衛親軍馬步軍都指揮使司

南京侍衛親軍馬步軍都指揮使蕭托果原作討古乾亨初為南京侍衛親軍都指揮使

南京馬步副指揮使

南京侍衛親軍馬軍都指揮使司

南京馬軍都指揮使

南京馬軍副指揮使

南京侍衛親軍步軍都指揮使司

南京步軍都指揮使

南京步軍副指揮使

南京栗園司

典南京栗園

雲州宣諭招撫使司

雲州管內宣諭招撫使二員統和四年見韓毗格

原作毗哥邢抱質為雲州管內宣諭

招撫使

南面大蕃府官

黃龍府

知黃龍府事與宗重熙十三年見知黃龍府事耶

律烏魯斯原作甌里斯

同知黃龍府事

黃龍府判官

黃龍府侍衛親軍馬步軍都指揮使

黃龍府侍衛親軍都指揮使

黃龍府侍衛親軍副指揮使

黃龍府侍衛馬軍都指揮使

黃龍府侍衛步軍都指揮使

黃龍府侍衛馬軍副指揮使

黃龍府侍衛步軍副指揮使

黃龍府學

博士

助教

興中府

知興中府事咸雍元年見知興中府事楊績

同知興中府事

興中府判官

興中府學

博士

助教

南面方州官

遼東西燕秦漢唐已置郡縣設官職矣高麗渤海因之至遼五京列峙包括燕代悉為畿甸二百餘年城郭相望田野益闢冠以節度承以觀察防禦團練等使分以刺史縣令大略採用唐制其間宗室外戚大臣之家築

城賜額謂之頭下州軍唯節度使朝廷命之後往往皆歸王府不能州者謂之軍不能縣者謂之城不能城者謂之堡其設官則未詳云

節度使職名總目

某州某軍節度使

某州某軍節度副使

同知節度使事耶律袞重熙中同知遼興軍節度

使事

行軍司馬

軍事判官

掌書記劉伸重熙五年為彰武軍節度使掌

書記

衙官

某馬步軍都指揮使司

都指揮使

副指揮使

某馬軍指揮使司

指揮使

副指揮使

某步軍指揮使司

指揮使

副指揮使

上京道

懷州奉陵軍節度使司

慶州元甯軍節度使司

秦州德昌軍節度使司

長春州韶陽軍節度使司

儀坤州啟聖軍節度使司

龍化州興國軍節度使司

饒州匡義軍節度使司

徽州宣德軍節度使司

成州長慶軍節度使司

懿州廣順軍節度使司

滑州高陽軍節度使司

鎮州建安軍節度使司

東京道

開州鎮國軍節度使司

保州宣義軍節度使司

辰州奉國軍節度使司

興州中興軍節度使司
海州南海軍節度使司
涿州鴨綠軍節度使司
顯州奉先軍節度使司
乾州廣德軍節度使司
貴德州寧遠軍節度使司
瀋州昭德軍節度使司
遼州始平軍節度使司
通州安遠軍節度使司
雙州保安軍節度使司
同州鎮安軍節度使司
咸州安東軍節度使司
信州彰聖軍節度使司

賓州懷化軍節度使司
懿州寧昌軍節度使司
蘇州安復軍節度使司
復州懷德軍節度使司
祥州瑞聖軍節度使司

中京道

成州興府軍節度使司
興中府彰武軍節度使司
宜州崇義軍節度使司
錦州臨海軍節度使司
川州長寧軍節度使司
建州保靜軍節度使司
來州歸德軍節度使司

南京道

幽州盧龍軍節度使司
平州遼興軍節度使司

西京道

雲中大同軍節度使司
雲內州開遠軍節度使司
奉聖州武定軍節度使司
蔚州忠順軍節度使司
應州彰國軍節度使司
朔州順義軍節度使司

觀察使職名總目

某州軍觀察使
某州軍觀察副使

某州軍觀察判官王鼎清寧五年為易州觀察判

官

州學

博士
助教

中京道

高州觀察使司
武安州觀察使司
利州觀察使司

東京道

益州觀察使司
寧州觀察使司
歸州觀察使司

寧江州混同軍觀察使司

上京道

永州永昌軍觀察使司

靜州觀察使司

團練使司職名總目

某州團練使

某州團練副使

某州團練判官

州學

博士

助教

東京道

安州團練使

防禦使司職名總目

某州防禦使

某州防禦副使

某州防禦判官

州學

博士

助教

東京道

廣州防禦使司

鎮海府防禦使司

冀州防禦使司

衍州安廣軍防禦使司

州刺史職名總目

某州刺史

某州同知州事耶律圖丹

原作獨攬

重熙中同知金肅

軍事

某州錄事參軍世宗天祿五年詔州錄事參軍委

政事省差注

州學

博士

助教

上京道五州烏降聖維防招

東京道三十七州穆賀盧鐵崇耀嬪遼西康宗海北巖

集祺遂韓銀安遠威清雍湖渤郢銅涑率賓

定理鐵利吉麓荆勝順化連肅烏

中京道十三州恩惠榆澤北安潭松山安德黔嚴隰遷

潤

南京道八州順檀涿易薊景灤營

西京道八州宏德寧邊歸化汗

原作可汗

儒武東勝

縣職名總目

某縣令

某縣丞

某縣主簿世宗天祿五年詔縣主簿政事省差注

某縣尉

縣學大公鼎為良鄉縣尹建孔子廟

博士

助教

五京諸州屬縣見地理志縣有驛遞馬牛旗鼓鄉正廳隸倉司等役有破產不能給者良民患之馬人望設法

使民出錢免役官自募人倉司給使以公使充人以為便

南面分司官

平理庶獄採撫民隱漢唐以來賢主以為恤民之令典官不常設有詔則選材望官為之

分決諸道滯獄使聖宗統和九年命邢抱朴等五員又命馬守瑛等三員分決諸道滯獄

按察諸道刑獄使開泰五年遣劉涇等分路按察刑獄採訪使太宗會同三年命于固靈原作骨鄰為採訪使

南面財賦官

遼國以畜牧田漁為稼穡財賦之官初甚簡易自聶崙原作涅里教耕織而後鹽鐵諸利日以滋殖既得燕代益富饒矣

諸錢帛司職名總目

某州錢帛都點檢大公鼎為長春州錢帛都提點

長春路錢帛司興宗重熙二十二年置

遼西路錢帛司

平州路錢帛司

轉運司職名總目

某轉運使

某轉運副使

同知某轉運使

某轉運判官

山西路都轉運使司楊哲興宗重熙二十年為山西轉

運使

奉聖州轉運使司聖宗開泰二年置

蔚州轉運使司

應州轉運使司

朔州轉運使司

保州轉運使司已上並開泰三年置

西山轉運使聖宗太平三年見西山轉運使郎元化

南面軍官

傳曰惟楚有材晉實用之遼自太祖以來攻掠五代宋境得其人則就用之東北二鄙以農以工有事則從軍政計之善者也

點檢司職名總目

某都點檢穆宗十三年見殿前都點檢耶律伊勒

哈剌葛 原作夷

某副點檢聖宗太平六年見副點檢耶律頁野原作野

同知某都點檢道宗清寧九年見同知點檢司事

耶律托卜嘉 原作撻不也

點檢司

殿前都點檢司

點檢侍衛親軍馬步司

諸指揮使司職名總目

某軍都指揮使聖宗統和二二年見侍衛親軍都指揮使韓倬

某軍副指揮使

某軍都監

某軍都指揮使司

某軍副指揮使司

並同前

侍衛親軍馬步軍都指揮使司

侍衛親軍馬軍都指揮使司

侍衛親軍步軍都指揮使司

侍衛控鶴兵馬都指揮使司

侍衛漢軍兵馬都指揮使司

四軍兵馬都指揮使司

歸聖軍兵馬都指揮使司聖宗統和五年以宋降軍置
七指揮署左右廂凡四十二員七年隸總管府

歸聖軍左廂兵馬都指揮使司

歸聖軍右廂兵馬都指揮使司

第一左廂兵馬都指揮使司

第一右廂兵馬都指揮使司

第二左廂兵馬都指揮使司

第二右廂兵馬都指揮使司

第三左廂兵馬都指揮使司

第三右廂兵馬都指揮使司

第四左廂兵馬都指揮使司

第四右廂兵馬都指揮使司

第五左廂兵馬都指揮使司

第五右廂兵馬都指揮使司

第六左廂兵馬都指揮使司

第六右廂兵馬都指揮使司

第七左廂兵馬都指揮使司

第七右廂兵馬都指揮使司

宣力軍都指揮使司

四捷軍都指揮使司

天聖軍都指揮使司

漢軍都指揮使司

諸軍都團練使職名總目

某軍都團練使趙思温太祖神冊二年為漢軍都

團練使

某軍團練副使

某軍團練判官

漢軍都團練使司

諸軍兵馬都總管府職名總目

某兵馬都總管聖宗太平四年見兵馬都總管

某兵馬副總管

同知某兵馬事

某兵馬判官

兵馬都總管府

歸聖軍兵馬都總管府

南面邊防官

三皇五帝寬柔之化澤及漢唐好生惡殺習與性成雖五代極亂習於戰鬪者才幾人耳宋以文勝然遼之邊防猶重於南面直以其地大民衆故耳卒之親仁善鄰桴鼓不鳴幾二百年此遼之所以為美也

易州飛狐招安使聖宗統和二十三年改安撫使司

易州飛狐兵馬司道宗咸雍四年改易州安撫司

易州飛狐招撫司

西南面招安使司耶律和卓原作合住景宗保寧初為西南

面招安使

巡檢使司耶律和卓原作合住景宗保寧中為巡檢使

遼史卷四十八
五州都總管府郎律蘇色原作速撒穆宗應歷初為義霸祥

順聖五州都總管

山後五州都管司聖宗統和四年見普努寧原作蒲寧為

山後五州都管

五州制置使司聖宗開泰九年見霸建宜泉錦五州制

置使

三州處置使司韓德極太宗時為平灤營三州處置使
霸州處置使司統和二十七年廢

遼史卷四十八

德陽劉子雄校字
成都方守道覆校

遼史卷四十九

元中書右丞相總裁托克托等修
志第十八

禮志一

理自天設情繇人生以理制情而禮樂之用行焉林豺
梁獺是生郊禘窪尊燔黍是生燕饗蘩埋瓦棺是生喪
葬儷皮緇布是生婚冠皇造帝秩三王彌文一文一質
蓋本於忠變通革弊與時宜之惟聖人為能通其意執
理者膠瑟聚訟不適人情徇情者稊稗綿蕪不中天理
秦漢而降君子無取焉遼本朝鮮故壤箕子八條之教
流風遺俗蓋有存者自其上世緣情制宜隱然有尚質
之風約尼原作遙和拉汗原作刺制祭山儀蘇汗原作蘇
制色克色哩原作瑟儀蘇爾威汗原作阻制柴冊再生儀

其情朴其用儉敬天恤災施惠本孝出於惻怛殆有得於膠瑟聚訟之表者太古之上椎輪五禮何以異茲太宗克晉稍用漢禮今國史院有金陳大任遼禮儀志皆其國俗之故又有遼朝雜禮漢儀爲多別得宣文閣所藏耶律儼志視大任爲加詳存其略著于篇

吉儀

祭山儀設天神地祇位于木葉山東鄉中立君樹前植羣樹以像朝班又偶植二樹以爲神門皇帝皇后至伊勒希巴原作夷具禮儀牲用赭白馬元牛赤白羊皆牡僕臣曰旗鼓伊喇原作殺牲體割懸之君樹太巫以酒酌牲禮官曰多囉倫穆騰原作敵奏儀辦皇帝服金文金冠白綾袍絳帶懸魚三山絳垂飾犀玉刀鍔絡縫烏靴皇后御絳帔絡縫紅袍懸玉佩雙結

帕絡縫烏靴皇帝皇后御鞍馬羣臣在南命婦在北服從各部旗幟之色以從皇帝皇后至君樹前下馬升南壇御榻坐羣臣命婦分班以次入就位合班拜訖復位皇帝皇后詣天神地祇位致奠閤門使讀祝訖復位坐北府宰相及特哩袞原作以次致奠于君樹徧及羣樹樂作羣臣命婦退皇帝率孟父仲父季父之族三匝神門樹餘族七匝皇帝皇后再拜在位者皆再拜上香再拜如初皇帝皇后升壇御龍文方茵坐再聲警詣祭東所羣臣命婦從班列如初巫衣白衣特哩袞原作以素巾拜而冠之巫三致辭每致辭皇帝皇后一拜在位者皆一拜皇帝皇后各舉酒二爵肉二器再奠大臣命婦右持酒左持肉各一器少後立一奠命特哩袞原作東向擲之皇帝皇后六

拜在位者皆六拜皇帝皇后復位坐命中丞奉茶果餅餌各二器奠于天神地祇位執事郎君二十人持福酒胙肉詣皇帝皇后前太巫奠醑訖皇帝皇后再拜在位者皆再拜皇帝皇后一拜飲福受胙復位坐在位者以次飲皇帝皇后率羣臣復班位再拜聲蹕一拜退

太祖幸幽州大悲閣遷白衣觀音像建廟木葉山尊為家神於拜山儀過樹之後增詣菩薩堂儀一節然後拜神非和拉汗原作胡刺可汗之故也興宗先有事于菩薩堂及木葉山遼河神然後行拜山儀冠服節文多所變更後因為常神主樹木懸牲告辦班位奠祝致嘏飲福往往暗合于禮天理人情放諸四海而準信矣夫興宗更制不能正以經術

無以大過於昔故不載

色克色哩

原作瑟瑟

儀若旱擇吉日行色克色哩

原作瑟瑟儀以

祈雨前期置百柱天棚及期皇帝致奠于先帝御容乃射柳皇帝再射親王宰執以次各一射中柳者質誌柳者冠服不中者以冠服質之不勝者進飲於勝者然後各歸其冠服又翼日植柳天棚之東南巫以酒醴黍稷薦植柳祝之皇帝皇后祭東方畢子弟射柳皇族國舅羣臣與禮者賜物有差既三日雨則賜多糶倫穆騰原作敵烈麻都馬四匹衣四襲否則以水沃之道宗清寧元年皇帝射柳訖詣風師壇再拜

柴冊儀擇吉日前期置柴冊殿及壇壇之制厚績薪以木為三級壇置其上席百尺擅龍文方茵又置再生母后搜索之室皇帝入再生室行再生儀畢八部之

叟前導後扈左右扶翼皇帝冊殿之東北隅拜日畢乘馬選外戚之老者御皇帝疾馳仆御者從者以氊覆之皇帝詣高阜地大臣諸部帥列儀仗遙望以拜皇帝遣使敕曰先帝升遐有伯叔父兄在當選賢者沖人不德何以爲謀羣臣對曰臣等以先帝厚恩陛下明德咸願盡心敢有他圖皇帝令曰必從汝等所願我將信明賞罰爾有功陟而任之爾有罪黜而棄之若聽朕命則當謨之僉曰唯帝命是從皇帝于所識之地封土石以誌之遂行拜先帝御容宴饗羣臣翼日皇帝出冊殿護衛太保扶翼升壇奉七廟神主置龍文方茵北南府宰相率羣臣圍立各舉氊邊贊祝訖樞密使奉玉寶玉冊入有司讀冊訖樞密使稱尊號以進羣臣三稱萬歲皆拜宰相北南院大王諸

部帥進赭白羊各一羣皇帝更衣拜諸帝御容遂宴羣臣賜賚各有差

拜日儀皇帝升露臺設褥向日再拜上香門使通閣使或副應拜臣僚殿左右階陪位再拜皇帝升坐奏勝訖北班起居畢時相已下通名再拜不出班奏聖躬萬福又再拜各祇候宣徽已下橫班同諸司閣門北面先奏事餘同教坊與臣僚同

告廟儀至日臣僚昧爽朝服詣太祖廟次引臣僚合班先見御容再拜畢引班首左上至褥位再拜贊上香揖欄內上香畢復褥位再拜各祇候立定左右舉告廟祝版於御容前跪捧中書舍人俛跪讀訖俛興退引班首左下復位又再拜分引上殿次第進酒三分班引出

謁廟儀至日昧爽南北臣僚各具朝服赴廟車駕至臣僚於門外依位序立望駕鞠躬班首不出班奏聖躬萬福舍人贊各祇候畢皇帝降車分引南北臣僚左右入至丹墀褥位合班定皇帝升露臺褥位宣徽贊皇帝再拜殿上下臣僚陪位皆再拜上香畢退復位再拜分引臣僚左右上殿位立進御容酒依常禮若即退再拜舍人贊好去引退禮畢

告廟謁廟皆曰拜容以先帝先后生辰及忌辰行禮自太宗始也其後正旦皇帝生辰諸節辰皆行之若忌辰及車駕行幸亦嘗遣使行禮凡色克色哩原作柴冊再生納后則親行之凡柴冊親征則告幸諸京則謁四時有薦新

孟冬朔拜陵儀有司設酒饌于山陵皇帝皇后駕至多

囉倫穆騰

原作敵烈麻都

奏儀辦閣門使贊皇帝皇后詣位

四拜訖巫贊祝燔胙及時服醑酒薦牲大臣命婦以次燔胙四拜皇帝皇后率羣臣命婦循諸陵各三匝還宮翼日羣臣入謝

燕節儀皇帝即位凡征伐叛國俘掠人民或臣下進獻人口或犯罪没官戶皇帝親覽閒田建州縣以居之設官治其事及帝崩所置人戶府庫錢粟穹廬中置小壇殿帝及后妃皆鑄金像納焉節辰忌日朔望皆致祭于穹廬之前又築土爲臺高丈餘置大盤于上祭酒食撒於其中焚之國俗謂之燕節

歲除儀初夕敕使及伊勒希巴

原作夷離畢

率執事郎君至

殿前以鹽及羊膏置爐中燎之巫及大巫以次贊祝火神訖閣門使贊皇帝面火再拜

初皇帝皆親拜至道宗始命伊勒希巴原作夷南畢拜之

遼史卷四十九

德陽劉子雄校字
成都方守道覆校

遼史卷五十

元中書右丞相總裁托克托等修
志第十九

禮志二

凶儀

喪葬儀聖宗崩興宗哭臨于葦塗殿大行之夕四鼓終
皇帝率羣臣入柩前三致奠奉柩出殿之西北門就
輜輶車藉以素裯巫者祓除之詰旦發引至祭所凡
五致奠太巫祈禳皇族外戚大臣諸京官以次致祭
乃以衣弓矢鞍勒圖畫馬馳儀衛等物皆燔之至山
陵葬畢上哀冊皇帝卽幄命改火面火致奠三拜又
東向再拜天地訖乘馬率送葬者過神門之木乃下
東向又再拜翼日詰旦率羣臣命婦詣山陵行初奠

之禮升御容殿受遺賜又翼日再奠如初興宗崩道宗親擇地以葬道宗崩菴塗于遊仙殿有司奉喪服天祚皇帝問禮于總知翰林院事耶律固始服斬衰皇族外戚使相矮敦官及郎君服如之餘官及承應人皆白桌衣巾以入哭臨特哩袞原作惕隱三父房南府宰相約尼原作遙輦常袞九奚首郎君伊勒希巴原作夷商畢國舅詳袞原作詳穩十扎薩克原作闡撒郎君南院大王郎君各以次薦奠進鞍馬衣襲犀玉帶等物表列其數讀訖焚表諸國所賻器服親王諸京留守奠祭進賻物亦如之先帝小斂前一日皇帝喪服上香奠酒哭臨其夜北院樞密使契丹行宮都部署入小斂翼日遣北院樞密副使林牙以所賻器服置之幽宮靈柩升車親王推之至食殺之次蓋遼國舊俗於此刑殺羊

以祭皇族外戚諸京州官以次致祭至葬所靈柩降車就輦皇帝免喪服步引至長福岡是夕皇帝入陵寢授遺物于皇族外戚及諸大臣乃出命以先帝寢幄過於陵前神門之木帝不親往遣近侍冠服赴之初奠皇帝皇后率皇族外戚使相節度使夫人以上命婦皆拜祭循陵三匝而降再奠如初辭陵而還上謚冊儀先一日於菴塗殿西廊設御幄并臣僚幕次大樂令展宮懸於殿庭協律郎設舉麾位至日北南面臣僚朝服昧爽赴菴塗殿先置冊寶案于西廊下閣使引皇帝至御幄服寬衣阜帶臣僚班齊分班引入嚮殿合班立定引冊案上殿至禱位寶案次之設於西階閣使引皇帝自西階升殿初行樂作至位立樂止宣徽使揖皇帝鞠躬再拜陪位者皆再拜翰林

使執臺琖以進皇帝再拜引至神座前跪奠三樂作進奠訖復位樂止又再拜陪位者皆再拜引皇帝于神座前北面立捧冊函者去蓋進前跪冊案退置殿西壁下引讀冊者進前俛伏跪自通全銜臣讀諡冊讀訖俛伏興復位捧冊函者置于案上捧寶函者進前跪讀寶官通銜跪讀訖引皇帝至禱位再拜陪位者皆再拜禮畢引皇帝歸御幄初行樂作至御幄樂止引臣僚分班出若皇太后奠酒依常儀

忌辰儀先一日奏忌辰榜子預寫名紙大紙一幅用陰面後第三行書文武百僚宰臣某以下謹詣西上閣門進名奉慰至日應拜大小臣僚並皂衣皂鞋帶四鼓至時於幕次前在京於僧寺班齊依位望闕敘立直日舍人跪右執名紙在前班首以下皆再拜引退

名紙於宣徽使面付內侍奏聞

宋使祭奠弔慰儀太皇太后至葦塗殿服喪服太后於北間南面垂簾坐皇帝於南間北面坐宋使至幕次宣賜素服皂帶更衣訖引南北臣僚入班立定可矮敦以下並上殿依位立先引祭奠使副捧祭文南洞門入殿上下臣僚並舉哀至丹墀立定西上閣門使自南階下受祭文上殿啓封置於香案哭止祭奠禮物列殿前引使副南階上殿至禱位立揖再拜引大使近前上香退再拜大使近前跪捧臺琖進奠酒三教坊奏樂退再拜揖中書二舍人跪捧祭文引大使近前俛伏跪讀訖舉哀引使副下殿立定哭止禮物擔牀出畢引使副近南面北立勾弔慰使副南洞門八四使同見大行皇帝靈再拜引出歸幕次皇太后

通身卷五十一
三
別殿坐服喪服先引北南面臣僚並於殿上下依位立弔慰使副捧書匣右入當殿立閣門使右下殿受書匣上殿奏封全開讀訖引使副南階上殿傳達弔慰訖退下殿立引禮物擔牀過畢引使副近南北面立勾祭奠使副入四使同見鞠躬再拜不出班奏聖躬萬福再拜出班謝面天顏又再拜立定宣徽傳聖旨撫問就位謝再拜引出歸幕次皇帝御南殿服喪服使副入見如見皇太后儀加謝遠接撫問湯藥再拜次宣賜使副并從人祭奠使副別賜讀祭文例物卽日就館賜宴高麗夏國奉弔進賻等使禮略如之道宗崩天祚皇帝問禮于耶律固宋國遣使弔及致祭歸贈皇帝喪服御游仙之北別殿使入門皇帝哭使者詣柩前上香讀祭文訖又哭有司讀遺詔慟哭

使者出少頃復入陳賻贈于柩前皇帝入臨哭退更衣御游仙殿南之幄殿使者入見且辭敕有司賜宴於館

宋使告哀儀皇帝素冠服臣僚阜袍鞞帶宋使奉書右於丹墀內立西上閣門使右階下殿受書匣上殿欄內鞠躬奏封全開封於殿西案授宰相讀訖皇帝舉哀舍人引使者右階上欄內俛跪附奏起居訖俛興立皇帝宣問南朝皇帝聖躬萬福使者跪奏來時皇帝聖躬萬福起退舍人引使者右階下殿於丹墀西面東鞠躬通事舍人通使者名某祇候見再拜不出班奏聖躬萬福再拜出班謝面天顏再拜又出班謝遠接撫問湯藥再拜贊祇候引出就幕次宣賜衣物引從人八通名拜奏聖躬萬福出就幕賜衣如使者

送身卷五十一
四
之儀又引使者入面殿鞠躬贊謝恩再贊有敕賜宴
再拜贊祇候出就幕次宴引從人謝恩拜敕賜宴皆
如初宴畢歸館

宋使進遺留禮物儀百官昧爽朝服殿前班立宋遺留
使告登位使副入內門館伴副使引謝登位使就幕
次坐館伴大使與遺留使副奉書入至西上閣門外
羶位立閣使受書匣置殿西階下案引進使引遺留
物於西上閣門入卽於廊下橫門出皇帝升殿坐宣
徽使押殿前班起居畢引宰臣押文武班起居引中
書令西階上殿奏宋使見勝子契丹臣僚起居控鶴
官起居遺留使副西上閣門入面殿立舍人引使副
西階上殿附奏起居訖引西階下殿於丹墀東西面
鞠躬通名奏聖躬萬福如告哀使之儀謝面天顏謝

遠接撫問湯藥引遺留使從人見亦如之次引告登
位使副奉書匣於東上閣門入面殿立閣使東階下
殿受書匣中書令讀訖舍人引使副東階上殿附奏
起居引下殿南面立告登位禮物入卽於廊下橫門
出退西面鞠躬附奏起居謝面天顏遠接等皆如遺
留使之儀宣賜遺留登位兩使副併從人衣物如告
哀使應坐臣僚皆上殿就位立分引兩使副等於兩
廊立皇帝問使副衝涉不易丹墀內五拜各引上殿
祇候位立大臣進酒皇帝飲酒契丹通漢人贊殿上
臣僚皆拜稱萬歲贊各就坐行酒殺茶饌饅頭畢從
人出水飯畢臣僚皆起契丹通漢人贊皆再拜稱萬
歲各祇候獨引宋使副下殿謝五拜引出控鶴官門
外祇候報閣門無事供奉官捲班出

高麗夏國告終儀先期於行宮左右下御帳設使客幕
次於東南至日北面臣僚各常服其餘臣僚並朝服
入朝使者至幕次有司以嗣子表狀先呈樞密院准
備奏呈先引北面臣僚并矮敦已上近御帳相對立
其餘臣僚依班位序立引告終人使右入至丹墀面
殿立引右上立揖少前拜跪奏訖宣問若嗣子已立
恭身受聖旨奏訖復位嗣子未立不宣問引右下丹
墀面北鞠躬通班畢引面殿再拜不出班奏聖躬萬
福再拜出班謝面天顏復位再拜出班謝遠接復位
再拜贊祇候退就幕次再入依前面北鞠躬通辭再
拜敘戀闕再拜贊好去禮畢

遼史卷五十

德陽劉子雄校字
成都方守道覆校

遼史卷五十一

元中書右丞相總裁托克托等修
志第二十一

禮志三

軍儀

皇帝親征儀常以秋冬應敵制變或無時將出師必先
告廟乃立三神主祭之曰先帝曰道路曰軍旅刑青
牛白馬以祭天地其祭常依獨樹無獨樹卽所舍而
行之或皇帝服介冑祭諸先帝宮廟乃閱兵將行牝
牡廬各一爲禡祭將臨敵結馬尾祈拜天地而後入
下城克敵祭天地牲以白黑羊班師以所獲牡馬牛
各一祭天地出師以死囚還師以一謀者植柱縛其
上于所向之方亂射之矢集如蝟謂之射鬼箭

臘儀臘十二月辰日前期一日詔司獵官選獵地其日
皇帝皇后焚香拜日畢設圍命獵夫張左右翼司獵
官奏成列皇帝皇后升輦多羅倫穆騰原作敵烈麻都以酒
二尊盤殮奉進北南院大王以下進馬及衣皇帝降
輿祭東畢乘馬入圍中皇太子親王率羣官進酒分
兩翼而行皇帝始獲兔羣臣進酒上壽各賜以酒至
中食之次親王大臣各進所獲及酒訖賜羣臣飲還
宮

應歷元年冬漢遣使來賀自是遂以為常儀統和
中罷之

出軍儀制見兵志

禮志四

賓儀

常朝起居儀昧爽臣僚朝服入朝各依幕次內侍奏班
齊先引京官班於三門外當直舍人放起居再拜各
祇候次引兩府以下文武官於丹墀內面殿立豎班
諸司并供奉官於東西道外相向立定當直閣使副
贊放起居再拜各祇候退還幕次公服帝升殿坐兩
府并京官丹墀內聲喏各祇候教坊司同北班起居
畢奏事

燕京嘉寧殿西京同文殿朝服幘頭袍笏公服紫
衫帽

正座儀皇帝升殿坐警聲絕契丹漢人殿前班畢各依
位侍立次教坊班畢捲退京官班入拜畢揖於右橫
街西依位班立次武班入拜畢依位立文班入拜畢
依位立北班入起居畢於左橫街東序班立次兩府

班入鞠躬通宰臣某官以下起居拜畢引上殿奏事
已上六班起居並七拜內有不帶節度使班首止
通名亦七拜捲班與常朝同直院有旨入文班留
守司三司統軍司制置司謂之京官都部署司宮
使副宮使都承以下令史北面主事以下隨駕諸
司爲武官館閣大理寺堂後以下御史臺隨駕閑
員令史司天臺翰林醫官院爲文官
天慶二年冬教坊並服袍

臣僚接見儀皇帝御座奏見膀子畢臣僚左入鞠躬通
文武百僚宰臣某官以下祇候見引面殿鞠躬起居
凡七拜引班首出班謝面天顏復位舞蹈五拜鞠躬
宣答問制再拜宣訖謝宣諭五拜各祇候畢可矮敦
以上引近前問聖躬萬福傳宣問跋涉不易鞠躬引

班舍人贊各祇候畢引右上準備宣問其餘臣僚並
於右侍立

宣答云卿等久居鄉邑來奉乘輿時屬霜寒或云
炎蒸諒多勞止卿各平安好想宜知悉

問聖體儀皇帝行幸車駕至納巴原作捺鉢坐御帳臣僚公
服問聖躬萬福贊再拜各祇候奏事宣徽以下常服
教坊與臣僚同

保大元年夏特旨通名再拜不稱宰臣
車駕還京儀前期一日宣徽以下橫班諸司閤門並公
服於宿帳祇候至日詰旦皇帝乘玉輅閣門宣諭軍
民訖導駕時相以下進至內門閤副勘箭畢通事舍
人鞠躬奏臣宣放仗禮畢

勘箭儀皇帝乘玉輅至內門北南臣僚於輅前對班立

勘箭官執雌箭門中立東上閣門使詣車前執雄箭
在車左立勾勘箭官進勘箭官揖進至車約五步面
車立閣使言受箭行勘勘箭官拜跪受箭舉手勘訖
鞠躬奏內外勘同閣使言准勅行勘勘箭官平立退
至門中舊位立當曾執箭贊軍將門仗官近前門仗
官應聲開門舉聲兩邊齊出並列左右立勘箭官舉
右手贊呈箭次贊內出喚仗御箭一隻准敕付左金
吾仗行勘贊合不合應合合贊同不同應同同同
訖勘箭官再進依位立鞠躬自通全銜臣某對御勘
箭同退門中立贊其箭謹付閣門使進入事畢其箭
授閣使轉付宣徽

宋使見皇太后儀宋使賀生辰正旦至日臣僚昧爽入
朝使者至幕次臣僚班齊皇太后御殿坐宣徽使押

殿前班起居畢捲班次契丹臣僚班起居畢引應坐
臣僚上殿就位立其餘臣僚不應坐者退於東面侍
立漢人臣僚東洞門入面西鞠躬舍人鞠躬通某以
下起居凡七拜畢贊各祇候引應坐臣僚上殿就位
立中書令大王西階上殿奏宋使并從人膀子訖就
位立其餘臣僚不應坐者退於西面侍立次引宋使
副六人於東洞門入丹墀內面殿齊立閣使自東階
下受書匣使人捧書匣者皆跪閣使搢笏立受書匣
自東階上殿欄內鞠躬奏封全訖授樞密開封宰臣
對皇太后讀訖引使副六人東階上殿欄內立使者
揖生辰節大使少前使者俛伏跪附起居訖起復位
立次引賀皇太后正旦大使附起居如前儀皇太后
宣問南朝皇帝聖躬萬福舍人揖生辰大使并皇太

后正旦大使少前皆跪惟生辰大使奏來時聖躬萬福皆倏伏興引東階下殿丹墀內面殿齊立引進使引禮物於西洞門入殿前置擔牀控鶴官起居四拜擔牀於東便門出畢揖使副退於東方西面皆鞠躬舍人鞠躬通南朝國信使某官某以下祇候見舞蹈五拜畢不出班奏聖躬萬福再拜揖班首出班謝面天顏訖復位舞蹈五拜畢贊各上殿祇候引各使副西階上殿就位勾從人兩洞門入面殿鞠躬通名贊拜起居四拜畢贊各祇候分班引兩洞門出若宣問使副跋涉不易引西階下殿丹墀內舞蹈五拜畢贊各上殿祇候引西階上殿就位立契丹舍人漢人閣使齊贊拜應坐臣僚并使副皆拜稱萬歲贊各就坐行湯行茶供過人出殿門揖臣僚并使副起鞠躬契

丹舍人漢人閣使齊贊皆拜稱萬歲贊各祇候先引宋使副西階下殿西洞門出次揖臣僚出畢報閣門無事皇太后起

宋使見皇帝儀宋使賀生辰正旦至日臣僚昧爽入朝使者至幕次奏班齊聲警皇帝升殿坐宣徽使押殿前班起居畢捲班出契丹臣僚班起居畢引應坐臣僚上殿就位立其餘臣僚不應坐者並退於北面侍立次引漢人臣僚北洞門入面殿鞠躬舍人鞠躬通某官某以下起居皆七拜畢引應坐臣僚上殿就位立引首相南階上殿奏宋使并從人膀子就位立臣僚並退於南面侍立教坊入起居畢引南使副北洞門入丹墀內面殿立閣使北階下殿受書匣使人捧書匣者跪閣使搢笏立受於北階上殿欄內鞠躬奏

封全訖授樞密開封宰相對皇帝讀訖舍人引使副
北階上殿欄內立揖生辰大使少前俛伏跪附起居
俛伏興復位立大使俛伏跪奏訖俛伏興退引北階
下殿揖使副北方南面鞠躬舍人鞠躬通南朝國信
使某官某以下祇候見起居七拜畢揖班首出班謝
面天顏舞蹈五拜畢出班謝遠接御筵撫問湯藥舞
蹈五拜畢贊各祇候引出歸幕次閣使傳宣賜對衣
金帶勾從人以下入見舍人贊班首姓名以下再拜
不出班奏聖躬萬福贊再拜稱萬歲贊各祇候引出
舍人傳宣賜衣使副并從人服賜衣畢舍人引使副
入丹墀內面殿鞠躬舍人贊謝恩拜舞蹈五拜畢贊
上殿祇候引使副南階上殿就位立勾從人人入贊謝
恩拜稱萬歲贊有敕賜宴再拜稱萬歲贊各祇候承

受官引北廊下立御牀人大臣進酒皇帝飲酒契丹
舍人漢人閣使齊贊拜應坐并侍立臣僚皆拜稱萬
歲贊各祇候卒飲贊拜應坐臣僚皆拜稱萬歲贊各
就坐行酒親王使相使副共樂曲若宣令飲盡並起
立飲訖放琰就位謝贊拜並隨拜稱萬歲贊各就坐
次行方茵地坐臣僚等官酒若宣令飲盡贊謝如初
殿上酒一行畢贊廊下從人拜稱萬歲贊各就坐若
傳宣令飲盡並拜稱萬歲贊各就坐殿上酒三行行
茶行殺行膳酒五行候曲終揖廊下從人起贊拜稱
萬歲贊各祇候引出曲破臣僚并使副並起鞠躬贊
拜應坐臣僚并使副皆拜稱萬歲贊各祇候引使副
南階下殿丹墀內舞蹈五拜畢贊各祇候引出次引
衆臣僚下殿出畢報閣門無事皇帝起聲蹕

通志卷五十一
曲宴宋使儀昧爽臣僚入朝宋使至幕次皇帝升殿殿
前教坊契丹文武班皆如初見之儀宋使副綴翰林
學士班東洞門人面西鞠躬舍人鞠躬通文武百僚
臣某以下起居七拜謝宣召赴宴致詞訖舞蹈五拜
畢贊各上殿祇候舍人引大臣使相臣僚使副及方
相朶殿應坐臣僚並於西階上殿就位立其餘不應
坐臣僚並於西洞門出勾從人人起居謝賜宴兩廊
立如初見之儀二人監殘教坊再拜贊各上殿祇候
御牀入大臣進酒舍人閣使贊拜行酒皆如初見之
儀次行方朶殿臣僚酒傳宣飲盡如常儀殿上酒
一行畢兩廊從人行酒如初殿上行餅茶畢教坊致
語揖臣僚使副并廊下從人皆起立候口號絕揖臣
僚等皆鞠躬贊拜殿上應坐并侍立臣僚皆拜稱萬

歲贊各就坐次贊廊下從人拜亦如之歇宴揖臣僚
起立御牀出皇帝起入閣引臣僚東西階下殿還幕
次內賜花承受官引從人出賜花亦如之簪花畢引
從人復兩廊位立次引臣僚使副兩洞門入復殿上
位立皇帝出閣復坐御牀入揖應坐臣僚使副及侍
立臣僚鞠躬贊拜稱萬歲贊各就坐贊兩廊從人亦
如之行單茶行酒行膳行果殿上酒九行使相樂曲
聲絕揖兩廊從人起贊拜稱萬歲贊各好去承受引
出曲破殿上臣僚使副皆起立贊拜稱萬歲贊各祇
候引臣僚使副東西階下殿契丹班謝宴出漢人并
使副班謝宴舞蹈五拜畢贊各好去引出畢報閣門
無事皇帝起

賀生辰正旦宋使朝辭太后儀臣僚使副班齊如曲宴

儀皇太后升殿坐殿前契丹文武起居上殿畢宰臣
奏宋使副從人朝辭膀子畢就位立舍人引使副北
洞門入面南鞠躬舍人鞠躬通南朝國信使某官某
以下祇候辭再拜不出班奏聖躬萬福再拜出班戀
闕致詞訖又再拜贊各上殿祇候舍人引南階上殿
就位立引從人贊姓名再拜奏聖躬萬福再拜稱萬
歲贊各好去引出殿上揖應坐臣僚并使副就位鞠
躬贊拜稱萬歲贊各就坐行湯行茶畢揖臣僚并南
引使副六人於欄內拜跪受書匣畢直起立揖少前
鞠躬受傳答語訖退於北階下殿丹墀內面殿鞠躬
舍人贊各好去引出臣僚出

賀生辰正旦宋使朝辭皇帝儀臣僚入朝如常儀宋使

至幕次於外賜從人衣物皇帝升殿宣徽契丹文武
班起居上殿如曲宴儀中書令奏宋使副并從人朝
辭膀子畢臣僚並於南面侍立教坊起居畢舍人引
使副六人北洞門入丹墀北方面南鞠躬舍人鞠躬
通南朝國信使某官某以下祇候辭再拜起居戀闕
如辭皇太后儀贊各祇候平身立揖使副鞠躬宣徽
贊有敕使副再拜鞠躬平身立宣徽使贊各賜卿對
衣金帶疋段弓箭鞍馬等想宜知悉使副平身立揖
大使三人少前俛伏跪搢笏閣門使授別錄賜物過
畢俛起復位立揖副使三人受賜亦如之贊謝恩舞
蹈五拜贊上殿祇候舍人引使副南階上殿就位立
引從人贊謝恩再拜起居再拜贊賜宴再拜皆稱萬
歲贊各祇候承受引兩廊立御牀入皇帝飲酒舍人

閣使贊臣僚使副拜稱萬歲皆如曲宴應坐臣僚拜稱萬歲就坐行酒樂曲方茵兩廊皆如之行殺行茶行膳亦如之行饅頭畢從人起如登位使之儀曲破臣僚使副皆起立拜稱萬歲如辭太后之儀使副下殿舞蹈五拜贊各上殿祇候引北階上殿欄內立揖生辰正旦大使二人少前齊跪受書畢起立揖磬折受起居畢退引北階下殿丹墀內並鞠躬舍人贊各好去引南洞門出次引殿上臣僚南北洞門出畢報閣門無事

高麗使入見儀臣僚常服起居應上殿臣僚殿上序立閣門奏勝子引高麗使副面殿立引上露臺拜跪附奏起居訖拜起立閣門傳宣王詢安否使副皆跪大使奏臣等來時詢安引下殿面殿立進奉物入列置

殿前控鶴官起居畢引進使鞠躬通高麗國王詢進奉宣徽使殿上贊進奉赴庫馬出擔牀出畢引使副退面西鞠躬舍人鞠躬通高麗國謝恩進奉使某官某以下祇候見舞蹈五拜不出班奏聖躬萬福再拜出班謝面天顏五拜出班謝遠接湯藥五拜贊各祇候使副私獻入列置殿前控鶴官起居引進使鞠躬通高麗國謝恩進奉某官某以下進奉宣徽使殿上贊如初引使副西階上殿序立皇帝不入御牀臣僚伴酒契丹舍人通漢人閣使贊再拜稱萬歲各就坐酒三行殺膳二味若宣令飲盡就位拜稱萬歲贊各就坐殺膳不贊起再拜稱萬歲引下殿舞蹈五拜贊各祇候引出於幕次內別差使臣伴宴起宣賜衣物訖遙謝五拜畢歸館

前宴高麗使儀臣僚入朝班齊皇帝升殿宣徽教坊控
鶴文武班起居皆如常儀謝宣宴如宋使儀贊各上
殿祇候契丹臣僚謝宣宴勾高麗使入面南鞠躬舍
人鞠躬通高麗國謝恩進奉使某官某以下起居謝
宣宴共十二拜贊各上殿祇候臣僚使副就位立大
臣進酒契丹舍人通漢人閣使贊上殿臣僚皆拜贊
各祇候進酒大臣復位立贊應坐臣僚拜贊各就坐
行酒若宣令飲盡贊再拜贊各就坐教坊致語臣僚
皆起立口號絕贊再拜贊各就坐凡拜皆稱萬歲曲
破臣僚起下殿契丹臣僚謝宴中書令以下謝宴畢
引使副謝七拜贊各好去控鶴官門外祇候報閣門
無事供奉官捲班出來日問聖體

高麗使朝辭儀臣僚起居上殿如常儀閣門奏高麗使

朝辭膀子起居戀闕如宋史之儀贊各上殿祇候引
西階上殿立契丹舍人贊拜稱萬歲贊各就坐中書
令以下伴酒三行殺膳二味皆如初見之儀既謝贊
有敕宴五拜贊各好去引出於幕次內別差使臣伴
宴畢賜衣物跪受遙謝五拜歸館

西夏國進奉使朝見儀臣僚常朝畢引使者左入至丹
墀面殿立引使者上露臺立揖少前拜跪附奏起居
訖俛興復位閣使宣問某安否鞠躬聽旨跪奏某安
俛伏興退復位引左下至丹墀面殿立禮物右入左
出畢閣使鞠躬通某國進奉使姓名候見共一十七
拜贊祇候平立有私獻過畢揖使者鞠躬贊進奉收
訖贊祇候引左上殿就位立臣僚使者齊聲啜酒三
行引使左下至丹墀謝宴五拜畢贊有勅宴五拜祇

候引右出禮畢於外賜宴客省伴宴仍賜衣物
西夏使朝辭儀常朝畢引使者左入通某國某使祇候
辭再拜不出班起居再拜出班戀闕致詞復再拜賜
衣物謝恩如常儀若賜宴五拜畢贊好去引右出

遼史卷五十一

德陽劉子雄校字
成都方守道覆校

遼史卷五十二

元中書右丞相總裁托克托等修

志第二十一

禮志五

嘉儀上

皇帝受冊儀前期一日尙舍奉御設幄於正殿北牖下
南面設御坐奉禮郎設官僚客使幕次於東西朝堂
太樂令設宮懸於殿庭舉麾位在殿第二重西階上
東向乘黃令陳車輅尙輦奉御陳輿輦尙舍奉御設
解劔席于東西階設文官六品已上位橫街南東方
西向武官五品已上位橫街南西方東向皆北上重
行每等異位將士各勒所部六軍仗屯諸門金吾仗
黃麾仗陳于殿庭至日押冊官引冊自西便門入置

通史卷五十二
冊案西階上通事舍人引侍從班入就位侍中東階下解劔履上殿欄外俛伏跪奏中嚴下殿劔履復位立閣使西階上殿欄外跪請木契面殿鞠躬奏奉敕喚仗殿中監少監殿中丞等押金吾四色仗入位臣僚後協律郎入就舉麾位符寶郎詣閣奉迎通事舍人引文官四品至六品武官三品至五品就門外位皇帝御輦至宣德門宣徽使押內諸司班起居引皇帝至閣服袞冕侍中東階下解劔履上殿版奏外辦太常博士引太常卿太常卿引帝內諸司出協律郎舉麾太樂令令撞黃鐘之鐘左五鐘皆應工人鼓祝樂作皇帝卽御坐宣徽使贊扇合樂止贊簾捲扇開符寶郎奉寶進左右金吾報平安通事舍人引文官三品武官二品已上入門樂作就相向位畢樂止通

事舍人引侍從班南班文官三品武官二品已上合班北向東班西上西班東上起居七拜分班各復位通事舍人引押冊官押冊自西階下至丹墀當殿置香案冊案置冊訖樂作就位樂止捧冊官近後東西相對立舍人引侍從班并南班合班北向如初贊再拜在位者皆再拜舞蹈五拜分班各復位如初捧冊官就西階下解劔席解劔履捧冊西階上殿樂作置冊御坐前東西立北向捧冊官西牖下立北上樂止讀冊官出班當殿立贊再拜三呼萬歲就西階下解劔席解劔履西階上殿欄內立當御坐前侍中取冊捧冊官捧冊匣至讀冊官前跪相對捧冊讀冊官俛伏跪讀訖俛伏興捧冊官跪左膝以冊授侍中侍中受冊以冊授執事者降自西階劔履訖復當殿位贊

再拜三呼萬歲復分班位舍人引侍從班南班合班
北向如初贊拜在位者皆拜舞蹈鞠躬如初通事舍
人引班首西階下解劔履上殿樂作就欄內位樂止
俛伏跪通全銜臣某等致詞稱賀訖俛伏興降西階
下帶劔納舄樂作復位樂止贊拜在位者皆再拜舞
蹈五拜鞠躬侍中臨軒西向稱有制皆再拜侍中宣
荅訖贊皆再拜舞蹈五拜分班各復位三品已上出
樂作出門畢樂止侍中當御坐俛伏跪通全銜奏禮
畢俛伏興退東階下殿帶劔納履復位宣徽使贊扇
合下簾太常博士太常卿引皇帝起樂作至閣樂止
舍人引文官四品武官三品以下出門外分班立次
引侍從班出次兵部吏部出次金吾出次起居郎舍
人出次殿中監少監押金吾細仗出仍位臣僚後次

東西上閣門使於丹墀內鞠躬奏衙內無事捲班出
閣門使丹墀內鞠躬揖奉敕放仗出門外文武班中
間立喚承受官承受官聲喏至閣使後鞠躬揖閣使
鞠躬稱奉敕放仗承受聲喏鞠躬揖平身立引聲奉
敕放仗聲絕趨退文武合班再拜舍人一員攝詞令
官殿前鞠躬揖稱奉敕放黃麾仗出放金吾仗亦如
之翼曰文武臣僚入問聖躬

太平元年行此儀大略遵唐晉舊儀又有上契丹
冊儀以蘇爾威汗原作阻柴冊禮合唐禮雜就之
又有上漢冊儀與此儀大同小異加以上寶儀

冊皇太后儀前期陳設於元和殿如皇帝受冊之儀至
曰皇帝御宏政殿冊入侍從班入門外金吾列仗文
武分班侍中解劔奏中嚴宣徽使請木契喚仗皆如

之樂工入閣使門外文武班中間立喚承受官聲喏趨至閣使後立閣使鞠躬揖稱奉敕喚仗承受官鞠躬聲喏揖引聲奉敕喚仗文武合班再拜殿中監押仗入文武官入亦如之宣徽使押內諸司供奉官天橋班候皇太后御紫宸殿乘平頭輦童子女童隊樂引至金鑾門閣使奏內諸司起居訖贊引駕自下先行至元和殿皇太后入西北隅閣內更衣侍中解劍上殿奏外辦宣徽受版入奏侍中降復位協律郎舉麾樂作太樂令太常卿導引皇太后升坐宣徽使贊扇合簾捲扇開樂止符寶郎奉寶置皇太后坐右左右金吾大將軍對揖鞠躬奏軍國內外平安東上閣門副使引丞相東門入西上閣門副使引親王西門入通事舍人引文武班入如儀樂作至位樂止文武

班趨進相向再拜退復位東西上閣門使宣徽使自宏政殿引皇帝御肩輿至西便門下引入門樂作至殿前位樂止宣徽使贊皇帝拜問皇太后聖躬萬福拜皇帝御西閣坐合班起居如儀北府宰相押冊中書樞密令史入人舁冊東西上閣門使引冊宣徽使引皇帝送冊樂作至殿前置冊位樂止宣徽使贊皇帝再拜稱萬歲羣臣陪位揖翰林學士四人大將軍四人舁冊皇帝捧冊行三舉武授冊舁之西階上殿樂作置太后坐前樂止皇帝冊西面東立舍人引丞相當殿再拜三呼萬歲解劍西階上殿樂作至讀冊位樂止俛伏跪讀冊訖俛伏三呼萬歲復班位宣徽使引皇帝下殿樂作至殿前位樂止皇帝拜舞蹈拜訖引皇帝西階上殿至皇太后坐前位俛跪致詞訖

俛伏興引西階下至殿前位拜舞蹈拜鞠躬侍中臨
軒宣太后荅稱有制皇帝再拜宣訖引皇帝上殿樂
作至西閣樂止丞相親王侍從文武合班贊拜舞蹈
三呼萬歲如儀丞相上賀侍中宣荅如儀丞相以下
出舉樂出門樂止侍中奏禮畢宣徽索扇扇合下簾
皇太后起舉樂入閣樂止文武官出門外分班侍從
兵部吏部起居金吾仗出如儀閣使奏放仗皆如皇
帝受冊之儀

冊皇后儀至日北南臣僚內外命婦詣端拱殿幕次皇
后至閣侍中奏中嚴引命婦班入就東西相向位立
皇帝臨軒命使發冊使副押冊至端拱殿門外幕次
侍中奏外辦所司承旨索扇扇上舉麾樂作皇后出
閣升坐扇開簾捲偃麾樂止引命婦合班面殿起居

入拜皇后降坐樂作至殿下褥位樂止引冊入置皇
后褥位前侍中傳宣皇后四拜命婦陪位皆拜引讀
冊官至皇后褥位前俛伏跪讀訖皇后四拜陪位者
皆拜引皇后升殿使臣引冊置皇后坐前冊案退西
向侍立命婦當殿稱賀四拜引班首東階上殿致詞
訖東階下殿復位四拜侍中奏宣荅稱有教旨四拜
宣荅訖四拜班首上殿進酒皇后賜押冊使副等酒
訖侍中奏禮畢承旨索扇樂作皇后起入閣樂止分
引命婦等東西門出

冊皇太子儀前期一日設幄坐於宣慶殿設文武官幕
次于朝堂并殿庭板位太樂令陳宮縣皆如皇帝受
冊儀守宮設皇太子次于朝堂北西向乘黃令陳金
輅朝堂門外西向皇太子儀仗笳簫鼓吹等陳宣慶

門外典儀設皇太子版位于殿橫街南近東北向設文武官五品以上位於樂縣東西餘官如常儀至日門下侍郎奉冊中書侍郎奉寶綬各置于案令史二人絳服對舉案立寶案在橫街北西向冊案在北門下侍郎中書侍郎並立案後侍中版奏中嚴皇太子遠遊冠絳紗袍秉珪出太子舍人引入就版位北面殿立東宮官三師以下皆從立皇太子東南西向太子入門樂作至位樂止典儀贊皇太子再拜在位者皆再拜中書令立太子東北西向門下侍郎引冊案中書侍郎取冊進授中書令退復位傳宣官稱有制皇太子再拜傳宣訖再拜中書令跪讀冊訖俛伏興皇太子再拜受冊退授左庶子中書侍郎取寶進授中書令皇太子進受寶退授左庶子中書令以下退

復位昇案者以案退典儀贊再拜皇太子拜在位者皆再拜太子舍人引皇太子退樂作出門樂止侍中奏禮畢皇太子升金輅左庶子以下夾侍儀仗鼓吹等並列宣慶門外三師三少諸宮臣於金輅前後導從鳴鏡而行還東宮宮庭先設仗衛如式至宮門鏡止皇太子降金輅舍人引入就位坐文武宮臣序班稱賀禮畢

冊王妃公主儀至日押冊使副并讀冊等官押冊東便門入持節前導至殿冊案置橫街北少東引使副等面殿立而鞠躬侍中臨軒稱有制皆再拜鞠躬宣制訖舞蹈五拜引冊於宣慶門出使副等押領儀仗冊案赴各私第廳前向闕陳列設傳宣受冊拜褥冊案置褥左去羃蓋使副案右序立受冊者就位立傳宣

稱有制再拜宣制畢昇冊人舉冊匣於褥前跪捧引
讀冊者與受冊者皆俛伏跪讀訖皆俛伏興受冊者
謝恩國王五拜王妃公主四拜若冊禮同日先上皇
太后冊寶次臨軒同制遣使冊皇后諸王妃主次冊
皇太子

皇帝納后之儀擇吉日至日后族畢集詰旦后出私舍
坐于堂皇帝遣使及媒者以牲酒饗餼至門執事者
以告使及媒者入謁再拜平身立少頃拜進酒于皇
后次及后之父母宗族兄弟酒徧再拜納幣致詞再
拜訖后族皆坐特哩袞原作楊隱夫人四拜請就車后辭
父母伯叔父母兄各四拜宗族長者皆再拜皇后升
車父母飲后酒致戒詞徧及使者媒者送者發輶伯
叔父母兄飲后酒如初教坊遮道贊祝后命賜以物

后族追拜進酒遂行將至宮門宰相傳敕賜皇后酒
徧及送者既至特哩袞原作楊隱率皇族奉迎再拜皇后
車至便殿東南七十步止特哩袞原作楊隱夫人請降車
負銀罌捧膝履黃道行後一人張羔裘若襲之前一
婦人捧鏡却行置鞍于道后過其上乃詣神主室三
拜南北向各一拜酌酒向謁者一拜起居訖再拜次
詣舅姑御容拜奠酒選皇族諸婦宜子孫者再拜之
授以罌膝又詣諸帝御容拜奠酒神賜襲衣珠玉珮
飾拜受服之后姊若妹陪拜者各賜物皇族迎者后
族送者徧賜酒皆相偶飲訖后坐別殿送后者退食
于次媒者傳旨命送后者列于殿北俟皇帝卽御坐
選皇族尊者一人當輿坐主婚禮命執事者往來致
辭于后族引后族之長率送后者升當御坐皆再拜

又一人少進附奏送后之詞退復位再拜后族之長及送后者向當奧者三拜南北向各一拜向謁者一拜后族之長跪問聖躬萬福再拜復奏送后之詞又再拜當奧者與媒者行酒三周命送后者再拜皆坐終宴翼曰皇帝晨興詣先帝御容拜奠酒訖復御殿宴后族及羣臣皇族后族偶飲如初百戲角觝戲馬較勝以爲樂又翼曰皇帝御殿賜后族及贐送后者各有差受賜者再拜進酒再拜皇帝御別殿有司進皇后服飾之籍酒五行送后者辭訖皇族獻后族禮物后族以禮物謝當奧者禮畢

公主下嫁儀選公主諸父一人爲婚主凡當奧者媒者致詞之儀自納幣至禮成大略如納后儀擇吉日詰旦媒者趣尙主之家詣宮埃皇帝皇后御便殿率其族入見進酒訖命皇族與尙主之族相偶飲翼日尙主之家以公主及壻率其族入見致宴于皇帝皇后獻贐送者禮物訖朝辭賜公主青幃車二螭頭蓋部皆飾以銀駕駟送終車一車樓純錦銀螭懸鐸後垂大氊駕牛載羊一謂之祭羊擬送終之具至覆尸儀物咸在賜其壻朝服四時襲衣鞍馬凡所須無不備選皇族一人送至其家

親王女封公主者婚儀倣此以親疏爲差降

遼史卷五十二

德陽劉子雄校字

成都方守道覆校

遼史卷五十三

元中書右丞相總裁托克托等修

志第二十二

禮志六

嘉儀下

皇太后生辰朝賀儀至日臣僚入朝國使至幕班齊如
 常儀皇太后升殿坐皇帝東面側坐契丹舍人殿上
 通名契丹漢人臣僚宋使副綴翰林學士班東西兩
 洞門入合班稱賀班首上殿祝壽分班引出皆如正
 旦之儀教坊起居七拜契丹漢人臣僚入進酒皆如
 正旦之儀惟宣答稱聖旨皇帝降御座進奉皇太后
 生辰禮物過畢皇帝殿上再拜殿下臣僚皆再拜皇
 帝升御座引臣僚分班出引中書令北大王西階上

通鑑卷五十三
殿奏契丹臣僚進奉次漢人臣僚并諸道進奉控鶴
官置擔牀起居四拜畢引進使鞠躬通文武百僚某
官某以下高麗夏國諸道進奉宣徽使殿上贊進奉
各付所司控鶴官聲喏擔牀過畢契丹漢人臣僚以
次謝五拜贊各祇候引出教坊諸道進奉使謝如之
契丹臣僚謝宣宴引上殿就位立漢人臣僚并宋使
副東洞門入面西謝宣宴如正旦儀贊各上殿祇候
臣僚使副上殿就位立亦如之監賤教坊上殿從人
入東廊立皆如之御牀入皇帝初進酒臣僚就位陪
拜皇太后飲酒殿上應坐侍立臣僚皆拜稱萬歲贊
各祇候立皇太后卒飲手賜皇帝酒皇帝跪卒飲退
就褥位再拜臣僚皆陪拜若皇帝親賜使相臣僚宋
使副酒皆立飲皇帝升坐贊應坐臣僚共使副皆拜

稱萬歲贊各就坐行方裯殿臣僚酒如正旦儀一
進酒兩廊從人拜稱萬歲各就坐親王進酒如正旦
儀若皇太后手賜親王酒跪飲訖退露臺上五拜贊
祇候殿上三進酒行餅茶訖教坊跪致語揖臣僚使
副廊下從人皆立口號絕贊拜亦如之行茶行殽膳
皆如之大饌入行粥盃殿上七進酒使相臣僚樂曲
終揖廊下從人起拜稱萬歲各好去承受官引兩門
出曲破揖臣僚使副起鞠躬贊拜皆拜稱萬歲贊各
祇候引臣僚使副下殿契丹臣僚謝宴畢出漢人臣
僚使副舞蹈五拜畢贊各好去出洞門畢報閤門無
事皇太后皇帝起

應聖節宋遣使來賀生辰正旦始制此儀故詳見

賓儀

通志卷五十三
凡五拜拜興再拜興跪搢笏三舞蹈三叩頭出笏
就拜興拜興再拜興其就拜亦曰俛伏興
賓儀臣僚皆日坐於此儀曰高禡與方禡別

皇帝生辰朝賀儀臣僚國使班齊皇帝升殿坐臣僚使
副入合班稱賀合班出皆如皇太后生辰儀中書令
北大王奏諸道進奉表目教坊起居七拜臣僚東西
門入合班再拜贊進酒班首上殿進酒宣徽使宣答
羣臣謝宣諭分班奏樂皇帝卒飲合班班首下殿分
班出皆如正旦之儀進奉皆如皇太后生辰儀皇帝
詣皇太后殿近上皇族外戚大臣並從奉迎太后卽
皇帝殿坐皇太后御小輦皇帝輦側步從臣僚分行
序引宣徽使諸司閤門攢隊前引教坊動樂控鶴起
居四拜引駕臣僚並於山樓南方立候皇太后入閣

搢使副并臣僚入幕次皇太后升殿坐皇帝東方側
坐引契丹漢人臣僚使副兩洞門入合班起居舞蹈
五拜贊各祇候面殿立皇帝降御座殿上立進皇太
后生辰物過畢皇帝殿上再拜殿上下臣僚皆拜皇
帝升御座引臣僚分班出契丹臣僚入謝宣宴漢人
臣僚使副入通名謝宣宴上殿就位不應坐臣僚出
從人入皆如儀御牀入皇帝初進皇太后酒皇太后
賜皇帝酒皆如皇太后生辰儀贊各就坐行酒宣飲
盡就位謝如儀殿上一進酒畢從人入就位如儀親
王進酒行餅茶教坊致語如儀行茶行殺膳如儀七
進酒使相樂曲終從人起曲破臣僚使副起餘皆如
正旦之儀

皇后生辰儀臣僚昧爽朝皇帝皇后大帳前拜曰契丹

漢人臣僚陪拜皇帝升殿坐皇后再拜臣僚殿下合班陪拜皇帝賜皇后生辰禮物皇后殿上謝再拜臣僚皆拜契丹舍人通名契丹漢人臣僚以次入賀瑤入舍人贊舞蹈五拜起居不表聖躬萬福贊再拜班首上殿拜跪自通全銜祝壽訖引下殿復位鞠躬贊舞蹈五拜贊各祇候引宰臣一員上殿奏百僚諸道進表目教坊起居七拜不賀控鶴官起居四拜諸道押衙附奏起居賜宴共八拜契丹漢人合班進壽酒舞蹈五拜引大臣一員上殿欄外褥位搯笏執臺瑤進酒皇帝皇后受瑤退復褥位授臺出笏欄內拜跪自通全銜祝壽臣等謹進千萬歲壽酒訖引下殿復位舞蹈五拜鞠躬宣徽使奏宣答如儀引上殿搯笏執臺皇帝皇后飲殿下臣僚分班教坊奏樂皆拜稱

萬歲卒飲皇帝皇后授瑤引下殿舞蹈五拜贊各祇候引出臣僚進奉如儀宣宴如儀教坊監瑤臣僚上殿祇候如儀皇后進皇帝酒殿上贊拜侍臣僚皆拜皇帝受瑤皆拜皇后坐契丹舍人漢人閣使殿上贊拜皆拜稱萬歲贊各就坐大臣進皇帝皇后酒行酒如儀酒三行行般行膳又進皇帝皇后酒酒再行大饌入行粥教坊致語臣僚皆起立口號絕贊拜稱萬歲引下殿謝宴引出皆如常儀

進士接見儀其日舉人從時相至御帳側通名膀子與時相膀子同奏訖時相朝見如常儀畢揖進士第一名以下丹墀內面殿鞠躬通名四拜贊各祇候皆退若有進文字者不退奉卷平立閣門奏受跪左膝授訖直起退禮畢

進士賜等甲敕儀臣僚起居畢讀卷官奏訖於左方依
等甲唱姓名序立閣使交收敕牒閣使奏引至丹墀
依等甲序立閣使稱有敕再拜鞠躬舍人宣敕各依
等甲賜卿敕牒一道想宜知悉揖拜各跪左膝受敕
訖鞠躬皆再拜各祇候分引左右相向侍立候奏事
畢引兩階上殿就位齊聲喏賜坐酒三行起聲喏如
初退揖出禮畢牌印郎君行酒閣使勸飲

進士賜章服儀皇帝御殿臣僚公服引進士入東方面
西再拜揖就丹墀位面殿鞠躬閣使稱有敕再拜鞠
躬舍人宣敕各依等甲賜卿敕牒一道兼賜章服想
宜知悉揖再拜跪受敕訖再拜退引至章服所更衣
訖揖復丹墀位鞠躬贊謝恩舞蹈五拜各祇候殿東
亭內序立聲喏坐賜宴簪花宣閣使一員閣門三人

或二人勸飲終日禮畢

宰相中謝儀皇帝常服升殿坐諸班起居如常儀應坐
臣僚上殿其餘臣僚殿下東西侍立皆如宋使初見
之儀引中謝官左入至丹墀面西立舍人當殿鞠躬
通新受具官姓名祇候中謝宣徽殿上索通班舍人
就贊禮位贊某官至宣徽贊通班舍人二人對立揖
中謝官鞠躬贊就拜位舍人二人引面殿鞠躬贊拜
中謝官舞蹈五拜不出班奏聖躬萬福贊再拜揖出
班跪敘官致詞訖俛伏興復位贊拜舞蹈五拜又出
班中謝致詞如初儀共十有七拜贊祇候引右階上
殿就位揖應坐臣僚聲喏坐供奉官行酒傳宣飲盡
臣僚搢笏執棧起位後立飲置棧出笏贊拜臣僚皆
再拜贊各坐搢笏執棧授供奉官棧酒三行揖應坐

臣僚聲喏立引中謝官右階下殿至丹墀面殿鞠躬贊拜舞蹈五拜引右出臣僚皆出丞相樞密使同餘官不升殿賜酒不帶節度使不通班止通名七拜衆謝班首一人出班中謝

拜表儀其日先於東上閣門陳設氈位分引南北臣僚諸國使副於氈位合班通事舍人二人舁表案置班首前揖鞠躬再拜平身中書舍人立案側班首跪搢笏興捧表跪左膝以表授中書舍人出笏就拜興再拜中書舍人復置表案上通事舍人舁表案於東上閣門入捲班分引出禮畢

元日皇帝不御坐行此儀餘應上表有故皆倣此賀生皇子儀其日奉先帝御容設正殿皇帝御八角殿升坐聲警畢北南宣徽使殿階上左右立北南臣僚

金冠盛服合班入班首二人捧表立讀表官先於左階上側立二宣徽使東西階下殿受表捧表者跪左膝授訖就拜興再拜各祇候二宣徽使俱左階上授讀表官讀訖揖臣僚鞠躬引北面班首左階上殿欄內稱賀訖引左階下殿復位舞蹈五拜禮畢

賀祥瑞儀聲警北南臣僚金冠盛服合班立班首二人各奉表賀北南宣徽使左階下殿受表上殿授讀表大臣讀訖揖殿下臣僚鞠躬五拜畢鞠躬引班首二人左階上殿欄內拜跪稱賀致詞訖引左階下殿復位五拜畢鞠躬宣答聽制訖再拜鞠躬謝宣諭五拜畢各祇候分班侍立禮畢兩府奏事如常

乾統六年木葉山瑞雲見始行此儀天慶元年天雨穀謝宣諭後趙王進酒教坊動樂臣僚酒一行

禮畢奏事

賀平難儀皇帝皇后升殿坐北南臣僚并命婦合班五拜揖班首二人出班俛跪搢笏執表昇案近前閣使受表置案上皆再拜通事舍人二人昇案左階上殿置露臺上讀表官受入讀表對御讀訖臣僚殿下五拜鞠躬引班首二人左右階上殿欄內並立先引北面班首少前跪致詞訖退復褥位次引南面班首亦如之畢分引左右階下殿復位五拜鞠躬宣徽稱有敕再拜宣答內難已平與公等內外同慶謝宣諭五拜捲班臣僚從皇帝命婦從皇后詣皇太后殿見先帝御容陪位皆再拜皇太后正坐稱賀共十拜並引上殿賜宴如儀

平難之儀道宗清寧九年太叔重元謀逆仁懿太

后親率衛士與逆黨戰事平因制此儀

正旦朝賀儀臣僚并諸國使昧爽入朝奏班齊皇帝升殿坐契丹舍人殿上通訖引契丹臣僚東洞門入引漢人臣僚并諸國使西洞門入合班舞蹈五拜鞠躬平身引親王東階上殿欄內褥位俛伏跪自通全銜臣某等祝壽訖伏興退引東階下殿復位舞蹈五拜畢鞠躬宣徽使殿上鞠躬奏臣宣荅稱有敕班首以下聽制訖再拜鞠躬宣徽傳宣云履新之慶與公等同之舍人贊謝宣諭拜舞蹈五拜贊各祇候分班引出引班首西階上殿奏表目訖教坊起居賀十二拜畢贊各祇候引契丹漢人臣僚并諸國使東西洞門入合班再拜贊進酒引親王東階上殿就欄內褥位搢笏執臺琖進酒訖退復褥位置臺出笏少前俛跪

自通全銜臣某等謹進千萬歲壽酒俛伏興退復禱
位與殿下臣僚皆再拜鞠躬俟宣徽使殿上鞠躬奏
臣宣荅稱有制親王以下再拜如初儀傳宣云飲公
等壽酒與公等內外同慶舍人贊謝宣諭如初贊各
祇候親王搢笏執臺殿下臣僚分班皇帝飲酒教坊
奏樂殿上下臣僚皆拜稱萬歲贊各祇候樂止教坊
再拜皇帝卒飲親王進受琖復禱位置臺琖出笏揖
臣僚合班引親王東階下殿復位鞠躬再拜贊各祇
候分班引出皇帝起詣皇太后殿臣僚并諸國使皆
從皇太后升殿皇帝東方側坐引契丹漢人臣僚并
諸國使兩洞門入班稱賀進酒皆如皇帝之儀畢引
出教坊入起居進酒亦如之皇太后宣荅稱聖旨契
丹班謝宣宴上殿就位立漢人臣僚并諸國使東洞

門入丹墀東方面西鞠躬舍人鞠躬通文武百僚宰
臣某已下謝宣宴再拜出班致詞訖退復位舞蹈五
拜贊各上殿祇候引宰臣以下并諸國使副方襴朶
殿臣僚西階上殿就位立不應坐臣僚並於西洞門
出二人監琖教坊再拜贊各上階下殿謝宴如皇太
后生辰儀

冬至朝賀儀臣僚班齊如正旦儀皇帝皇后拜日臣僚
陪位再拜皇帝皇后升殿坐契丹舍人通臣僚入合
班親王祝壽宣荅皆如正旦之儀謝訖舞蹈五拜鞠
躬出班奏聖躬萬福復位再拜鞠躬班首出班俛伏
跪祝壽訖伏興舞蹈五拜鞠躬贊各祇候分班不出
合班御牀入再拜鞠躬贊進酒臣僚平身引親王左
階上殿就欄內禱位搢笏執臺琖進酒皇帝皇后受

璣訖退就褥位置臺出笏俛伏跪少前自通全銜臣
某等謹進千萬歲壽酒俛伏興退復褥位再拜鞠躬
殿下臣僚皆再拜鞠躬宣答如正旦儀親王摺笏執
臺分班皇帝皇后飲酒奏樂殿上下臣僚皆拜稱萬
歲壽樂止教坊再拜臣僚合班親王進受璣至褥位
置臺璣出笏引左階下殿御牀出親王復丹墀位再
拜鞠躬贊祇候分班引出班首右階上殿奏表目進
奉諸道進奉教坊進奉過訖贊進奉收班首舞蹈五
拜鞠躬贊各祇候班首出臣僚復入合班謝舞蹈五
拜鞠躬贊各祇候分班引出聲警皇帝皇后起赴北
殿皇太后於御容殿與皇帝皇后率臣僚再拜皇太
后上香皆再拜贊各祇候可矮敦以上上殿皇太后
三進御容酒陪位皆拜皇太后升殿坐皇帝就露臺

上褥位親王押北南臣僚班丹墀內立皇帝再拜臣
僚皆拜鞠躬皇帝欄內跪祝皇太后壽訖復位再拜
凡拜皆稱萬歲贊各祇候臣僚不出皇帝皇后側座
親王進酒臣僚陪拜皇太后宣答皆如正旦之儀臣
僚分班不出班首右階上殿奏表目合班謝宣宴上
殿就位如儀御牀入皇帝進皇太后酒如初各就坐
行酒宣飲盡如皇太后生辰之儀皇后進酒如皇帝
之儀三進酒行茶教坊致語行殺膳大饌七進酒曲
破臣僚起御牀出謝宴皆如皇太后生辰儀

立春儀皇帝出就內殿拜先帝御容北南臣僚丹墀內
合班再拜可矮敦以上入殿賜坐帝進御容酒陪位
并侍立皆再拜一進酒臣僚下殿左右相向立皇帝
戴幡勝等第賜幡勝臣僚簪畢皇帝於土牛前上香

三奠酒不拜教坊動樂侍儀使跪進綵杖皇帝鞭土牛可矮敦以上北南臣僚丹墀內合班跪左膝受綵杖直起再拜贊各祗候司辰報春至鞭土牛三匝矮敦鞭止引節度使以上上殿撒穀豆擊土牛撒穀豆許眾奪之臣僚依位坐酒兩行春盤入酒三行畢行茶皆起禮畢

重午儀至日臣僚昧爽赴御帳皇帝繫長壽綵縷升車坐引北南臣僚合班如丹墀之儀所司各賜壽縷揖臣僚跪受再拜引退從駕至膳所酒三行若賜宴臨時聽敕

重九儀北南臣僚旦赴御帳從駕至圍場賜茶皇帝就坐引臣僚御前班立所司各賜菊花酒跪受再拜酒三行揖起

藏鬪儀至日北南臣僚常服入朝皇帝御天祥殿臣僚依位賜坐契丹南面漢人北面分朋行鬪或五或七籌賜膳入食畢皆起頃之復坐行鬪如初晚賜茶三籌或五籌罷教坊承應若帝得鬪臣僚進酒訖以次賜酒

太康十年十二月二十二日始行是儀是日不御朝

歲時雜儀正日國俗以糯飯和白羊髓爲餅丸之若拳每帳賜四十九枚戊夜各於帳內窗中擲丸於外數偶動樂飲宴數奇令巫十有二人鳴鈴執箭繞帳歌呼帳內爆鹽壚中燒地拍鼠謂之驚鬼居七日乃出是日爲阿尼雅伊能伊原作迺捏伊呢國語迺正也捏伊呢旦也

立春婦人進春書刻青繒爲幟像龍御之或爲蟾蜍書
幟曰宜春

人日凡正月之日一雞二狗三豕四羊五馬六牛七日
爲人其占晴爲祥陰爲災俗煎餅食於庭中謂之薰
天

二月一日爲中和節國舅族蕭氏設宴以延國族耶律
氏歲以爲常是日爲扎拉巴原作押里國語押里請也
吋時也押讀若狎吋讀若頗

二月八日爲悉達太子生辰京府及諸州雕木爲像儀
仗百戲導從循城爲樂悉達太子者西域淨梵王子
姓瞿曇氏名釋迦牟尼以其覺性稱之曰佛

三月三日爲上巳國俗刻木爲兔分朋走馬射之先中
者勝負朋下馬列跪進酒勝朋馬上飲之是日爲陶

拉噶爾布噶

原作陶里

國語陶里免也樵射也

五月重五日午時採艾葉和綿著衣七事以奉天子北
南臣僚各賜三事君臣宴樂渤海膳夫進艾糕以五
綵絲爲索纏臂謂之合歡結又以綵絲宛轉爲人形
簪之謂之長命縷是日爲托卜伊能伊原作討國語
討五賽呀呢月也

夏至之日俗謂之朝節婦人進綵扇以粉脂囊相贈遺
六月十有八日國俗耶律氏設宴以延國舅族蕭氏亦
謂之扎拉巴原作押里

七月十三日夜天子於宮西三十里卓帳宿焉前期備
酒饌翼日諸軍部落從者皆動番樂飲宴至暮乃歸
行宮謂之迎節十五日中元動漢樂大宴十六日昧
爽復往西方隨行諸軍部落大譟三謂之送節是爲

賽音伊能伊

原作賽
雅呢奢

國語奢好也

八月八日國俗屠白犬於寢帳前七步瘞之露其喙後

七日中秋移寢帳於其上謂之伊克努爾

原作捏
褐耐國

語捏褐犬也耐首也

九月重九日天子率羣臣部族射虎少者為負罰重九

宴射畢擇高地卓帳賜番漢臣僚飲菊花酒免肝為

鸚鹿舌為醬又研茱萸酒洒門戶以禳穰是日為博

羅哩烏楚哩

原作必
里遲離

國語必里遲離九月九日也

歲十月五京進紙造小衣甲槍刀器械萬副十五日天

子與羣臣望祭木葉山用國字書狀并焚之謂之達

勒噶喀

原作
戴練

國語戴燒也辣甲也

冬至日國俗屠白羊白馬白鷹各取血和酒天子望拜

黑山黑山在境北俗謂國人魂魄其神司之猶中國

之岱宗云每歲是日五京進紙造人馬萬餘事祭山
而焚之俗甚嚴畏非祭不敢近山

臘辰日天子率北南臣僚並戎服戊夜坐朝作樂飲酒

等第賜甲仗羊馬是日為縛哈雅布

原作炒
伍倆耐

國語炒

伍倆戰也

再生儀凡十有二歲皇帝本命前一年季冬之月擇吉

日前期禁門北除地置再生室母后室先帝神主輿

在再生室東南側植三歧木其日以童子及產醫嫗

置室中一婦人執酒一叟持矢箠立於室外有司請

神主降輿致奠奠訖皇帝出寢殿詣再生室羣臣奉

迎再拜皇帝入室釋服跪以童子從三過歧木之下

每過產醫嫗致詞拂拭帝躬童子過歧木七皇帝臥

木側叟擊箠曰生男矣太巫幪皇帝首興羣臣稱賀

再拜產醫姬受酒于執酒婦以進太巫奉襪祿綵結等物贊祝之預選七叟各立御名繫于綵皆跪進皇帝選嘉名受之賜物再拜退羣臣皆進襪祿綵結等物皇帝拜先帝諸御容遂宴羣臣

善哉蘇爾威汗

原作阻
午可汗

之垂訓後嗣也孺子無不

慕其親者嗜欲深而愛淺妻子具而孝衰人人皆然而況天子乎再生之儀歲一週星使天子一行是禮以起其孝心夫體之也真則其思之也切孺子之慕將有油然發于中心者感發之妙非言語文字之所能及善哉蘇爾威汗

原作阻
午可汗

之垂訓後

嗣也始之以三過歧木母氏劬勞能無念乎終之以拜先帝御容敬承宗廟宜何如哉詩曰無念爾祖聿修厥德

遼史卷五十三

德陽劉子雄校字

成都方守道覆校

遼史卷五十四

元中書右丞相總裁托克托等修
志第二十三

樂志

遼有國樂有雅樂有大樂有散樂有饒歌橫吹樂舊史稱聖宗興宗咸通音律聲氣歌辭舞節徵諸太常儀鳳教坊不可得按紀志遼朝雜禮參考史籍定其可知者以補一代之闕文嗚呼咸韶夏武之樂聲亡書逸河間作記史遷因以爲書寥乎希哉遼之樂觀此足矣

國樂

遼有國樂猶先王之風其諸國樂猶諸侯之風故志其略

正月朔日朝賀用宮懸雅樂元會用大樂曲破後用散

樂角觝終之是夜皇帝燕飲用國樂

七月十三日皇帝出行宮三十里卓帳十四日設宴應

從諸軍隨各部落動樂十五日中元大宴用漢樂

春飛放杏塢皇帝射獲頭鵝薦廟燕飲樂工數十人執

小樂器侑酒

諸國樂

太宗會同三年晉宣徽使楊端王眺等及諸國使朝見

皇帝御便殿賜宴端眺起進酒作歌舞上為舉觴極

歡

會同三年端午日百僚洎諸國使稱賀如式燕飲命回

鶻燉煌二使作本國舞

天祚天慶二年駕幸混同江頭魚酒筵半酣上命諸部

長次第歌舞為樂女直阿固達原作阿固達骨打端立直視辭

以不能上謂蕭奉先曰阿固達原作阿固達骨打意氣雄豪顧

視不常可托以邊事殺之不然恐貽後患奉先奏阿

固達原作阿固達骨打無大過殺之傷向化之意葢爾小國又

何能為

雅樂

自漢以後相承雅樂有古頌焉有古大雅焉遼闕郊廟

禮無頌樂大同元年太宗自汴將還得晉太常樂譜宮

懸樂架委所司先赴中京

聖宗太平元年尊號冊禮設宮懸於殿庭舉麾位在殿

第三重西階之上協律郎各入就舉麾位太常博士

引太常卿太常卿引皇帝將仗動協律郎舉麾太樂

令令撞黃鐘之鐘左右鐘皆應工人舉祝樂作皇帝

即御坐扇合樂止

王公入門樂作至位樂止

通事舍人引押冊大臣初動樂作置冊殿前香案訖就位樂止

昇冊官奉冊初動樂作升殿置冊御坐前就西墻北上位樂止

大臣上殿樂作至殿欄內位樂止

大臣降殿階樂作復位樂止

王公三品以下出樂作太常博士引太常卿太常卿引皇帝降御坐入閣樂止

興宗重熙九年上契丹冊皇帝出奏隆安之樂

聖宗統和元年冊承天皇帝太后設宮懸篋簾太樂工協律郎人

太后儀衛動舉麾太和樂作大樂令太常卿導引升

御坐簾捲樂止

文武三品以上入舒和樂作至位樂止

皇帝入門雍和樂作至殿前位樂止

宰相押冊皇帝隨冊樂作至殿前置冊於案樂止

翰林學士大將軍昇冊樂作置御坐前樂止

丞相上殿樂作至讀冊位樂止

皇帝下殿樂作至位樂止

太后宣答訖樂作皇帝至西閣樂止

親王丞相上殿樂作退班出樂止

下簾樂作皇太后入內樂止

冊皇太子儀太子初入門貞安之樂作

冊禮樂工次第

四隅各置建鼓一篋樂工各一人

宮懸每面九簾樂工一人

樂簾近北置祝敵各一樂工各一人

樂簾內坐部樂工左右各一百二人

樂簾西南武舞六十四人執小旗二人

樂簾東南文舞六十四人執小旗二人

協律郎二人

太樂令一人

唐十二和樂遼初用之

豫和祀天神

順和祭地祇

永和享宗廟

肅和登歌奠玉帛

雍和入俎接神

壽和酌獻飲神

太和節升降

舒和節出入

昭和舉酒

休和以飯

正和皇后受冊以行

承和太子以行

遼十二安樂初梁改唐十二和樂為九慶樂後唐建唐

宗廟仍用十二和樂晉改為十二同樂遼雜禮天子

出入奏隆安太子行奏貞安則是遼嘗改樂名矣餘

十安樂名缺

遼雅樂歌辭文闕不具八音器數大抵因唐之舊

八音

金 鐃鐘

石 球磬

絲 琴瑟

竹 簫簞箏

匏 笙竽

土 壎

革 鼓鼗

木 祝敔

十二律用周黍尺九寸管空徑三分為本道宗太康中詔行秬黍所定升斗嘗定律矣其法大抵用古律焉

大樂

自漢以來因秦楚之聲置樂府至隋高祖詔求知音者鄭譯得西域蘇祇婆七旦之聲求合七音八十四調之

說由是雅俗之樂皆此聲矣用之朝廷別於雅樂者謂之大樂晉高祖使馮道劉煦冊應天太后太宗皇帝其聲器工官與法駕同歸於遼

聖宗太平元年冊承天皇太后童子弟子隊樂引太后

輦至金鑾門

天祚皇帝天慶元年上壽儀

皇帝出東閣鳴鞭樂作 簾捲扇開樂止

太尉執臺分班太樂令舉麾樂作 皇帝飲酒訖樂

止

應坐臣僚東西外殿太樂令引堂上樂升大臣執臺

太樂令奏舉觴登歌樂作飲訖樂止

行臣僚酒徧太樂令奏巡周舉麾樂作 飲訖樂止

太常卿進御食太官令奏食徧樂作 文舞入三變

引出樂止

次進酒行臣僚酒舉觴巡周樂作 飲訖樂止

次進食食徧樂作 武舞入三變引出樂止

扇合簾下鳴鞭樂作 皇帝入西閣樂止

大樂器本唐太宗七德九功之樂武后毀唐宗廟七德九功樂舞遂亡自後宗廟用隋文武二舞朝廷用高宗景雲樂代之元會第一奏景雲樂舞杜佑通典已稱諸樂並亡唯景雲樂舞僅存唐末五代板蕩之餘在者希矣遼國大樂晉代所傳雜禮雖見坐部樂工左右各一百二人蓋亦以景雲遺工充坐部其坐立部樂自唐已亡可考者唯景雲四部樂舞而已

玉磬

方響

擗箏

筑

臥箜篌

大箜篌

小箜篌

大琵琶

小琵琶

大五絃

小五絃

吹葉

大笙

小笙

鬻篋

簫

銅鈸

長笛

尺八笛

短笛

以上皆一人

毛員鼓

連鼓

具

以上皆二人餘每器工一人

歌二人

舞二十人分四部

景雲舞八人

慶雲樂舞四人

破陣樂舞四人

承天樂舞四人

大樂調雅樂有七音大樂亦有七聲謂之七旦一曰婆
隨力平聲二曰雞識長聲三曰沙識質直聲四曰沙侯
加濫聲五曰沙臘皆應聲六曰般贍五聲七曰俟利箏
斛先聲自隋以來樂府取其聲四旦二十八調為大樂
婆隨力旦

正宮

高宮

中呂宮

道調宮

南呂宮

仙呂宮

黃鐘宮

雞識旦

越調

大食調

高大食調

雙調

小食調

歇指調

林鐘商調

沙識旦

大食角

高大食角

雙角

小食角

歇指角

林鍾角

越角

沙侯加濫旦

中呂調

正平調

高平調

仙呂調

黃鍾調

般涉調

高般涉調

右四旦二十八調不用黍律以琵琶絃叶之皆從濁至
清迭更其聲下益濁上益清七七四十九調餘二十一
調失其傳蓋出九部樂之龜茲部云
大樂聲各調之中度曲協音其聲凡十日五凡工尺上
一四六勾合近十二雅律於律呂各闕其一猶雅音之
不及商也

散樂

殷人作靡靡之樂其聲往而不反流爲鄭衛之聲秦漢
之間秦楚聲作鄭衛寢亡漢武帝以李延年典樂府稍
用西涼之聲今之散樂俳優歌舞雜進往往有漢樂府
之遺聲晉天福三年遣劉煦以伶官來歸遼有散樂蓋
由此矣

遼冊皇后儀

呈百戲角觥戲馬以爲樂

皇帝生辰樂次

酒一行 罍篋起歌

酒二行 歌手伎入

酒三行 琵琶獨彈

餅茶致語

食入雜劇進

酒四行

闕

酒五行 笙獨吹鼓笛進

酒六行 箏獨彈築毬

酒七行 歌曲破角觥

曲宴宋國使樂次

酒一行 觥策起歌

酒二行 歌

酒三行 歌手伎入

酒四行 琵琶獨彈

餅茶致語

食入雜劇進

酒五行

闕

酒六行 笙獨吹法合曲

酒七行 箏獨彈

酒八行 歌擊架樂

酒九行 歌角觥

散樂以三音該三才之義四聲調四時之氣應十二管

之數截竹為四竅之笛以叶音聲而被之絃歌三音天音揚地音抑人音中皆有聲無文四時春聲曰平夏聲曰上秋聲曰去冬聲曰入

散樂器觥策簫笛笙琵琶五絃箏篪箏方響杖鼓第二鼓第三鼓腰鼓大鼓鞞拍板

雜戲自齊景公用倡優侏儒至漢武帝設魚龍曼延之戲後漢有繩舞自刳之伎杜佑以為多幻術皆出西域

鼓吹樂

鼓吹樂一曰短簫鏡歌樂自漢有之謂之軍樂遼雜禮朝會設熊羆十二案法駕有前後部鼓吹百官鹵簿皆有鼓吹樂

前部

鼓吹令二人

柁鼓十二

金鉦十二

大鼓百二十

長鳴百二十

鏡十二

鼓十二

歌二十四

管二十四

簫二十四

箏二十四

後部

大角百二十

鼓吹丞二人

羽葆十二

鼓十二

管二十四

笛二十四

鏡十二

鼓十二

簫二十四

箏二十四

右前後鼓吹行則導駕奏之朝會則列仗設而不奏
橫吹樂

橫吹亦軍樂與鼓吹分部而同用皆屬鼓吹令
前部

大橫吹百二十

節鼓二

笛二十四

觥篥二十四

笳二十四

桃皮觥篥二十四

柁鼓十二

金鈺十二

小鼓百二十

中鳴百二十

羽葆十二

鼓十二

管二十四

簫二十四

笳二十四

後部

小橫吹百二十四

笛二十四

簫二十四

觥篥二十四

桃皮觥篥二十四

百官鼓吹橫吹樂自四品以上各有增損見儀衛志自周衰先王之樂寢以亡缺周南變為秦風始皇有天下鄭衛秦燕趙楚之聲迭進而雅聲亡矣漢唐之盛文事多西音是為大樂散樂武事皆北音是為鼓吹橫吹樂雅樂在者其器雅其音亦西云

遼史卷五十四

德陽劉子雄校字
成都方守道覆校

遼史卷五十五

元中書右丞相總裁托克托等修
志第二十四

儀衛志一

遼太祖奮自朔方太宗繼志述事以成其業於是舉渤海立敬瑭破重貴盡致周秦兩漢隋唐文物之遺餘而居有之路車法物以隆等威金符玉璽以布號令是以傳至九主二百餘年豈獨以兵革之利士馬之強哉文謂之儀武謂之衛足以成一代之規模矣考遼所有輿服符璽儀仗作儀衛志

輿服

自黃帝而降輿服之制其來遠矣禹乘四載作小車商人得桑根之瑞爲大輅周人加金玉象飾益備秦取六

國儀物而分別其用先王之制置而弗御至漢中葉銳
意稽古然禮文之事名存實亡蓋得十一於千百焉唐
之車輅因周隋遺法損益可知而祭服皆清朝服皆絳
常服用宇文制以紫緋綠碧分品秩五代頗以常服代
朝服遼國自太宗入晉之後皇帝與南班漢官用漢服
太后與北班契丹臣僚用國服其漢服卽五代晉之遺
制也考之載籍之可徵者著輿服篇冠諸儀衛之首

國輿

契丹故俗便於鞍馬隨水草遷徙則有羶車任載有大
車婦人乘馬亦有小車貴富者加之華飾禁制疏闊貴
適用而已帝后加隆勢固然也輯其可知者著于篇
大輿柴冊再生儀載神主見之
輿臘儀見皇帝皇后升輿降輿

總燾車駕以御馳祭山儀見皇太后升總燾車

車納后儀見皇后就車

青幟車二螭頭蓋部皆飾以銀駕用駝公主下嫁以
賜之古者主婦下嫁車服不繫其夫下王后一等
此其遺意歟

送終車車樓純飾以錦螭頭以銀下縣鐸後垂大羶
駕以牛上載羊一謂之祭羊以擬送終之用亦賜

公主

椅冊皇太后儀皇帝乘椅自便殿舉至西便門

鞍馬祭山儀皇帝乘馬侍皇太后行臘儀皇帝降輿

祭東畢乘馬入獵圍色克色哩原作瑟瑟儀俱乘馬東

行羣臣在南命婦在北

漢輿

太宗皇帝會同元年晉使馮道劉昫等備車輅法物上
皇帝皇太后尊號冊禮自此天子車服昉見於遼太平
中行漢冊禮乘黃令陳車輅尙輦奉御陳輿輦盛唐輦
輅盡在遼廷矣

五路周官典輅有五輅秦亡之後漢創製

玉輅祀天祭地享宗廟朝賀納后用之青質玉飾黃
屋左纛十二鑾在衡二鈴在軾龍輶左建旂十二
旂皆畫升龍長曳地駕蒼龍金叟鏤錫鞶纓十二
就遼國勘箭儀皇帝乘玉輅至內門聖宗開泰十
年上升玉輅自內三門入萬壽殿進七廟御容酒
金輅饗射祀還飲至用之赤質金飾餘如玉輅色從
其質駕赤騮
象輅行道用之黃質象飾餘如金輅駕黃騮

革輅巡狩武事用之白質革鞞駕白翰

木駱田獵用之黑質漆飾駕黑駱

車制小於輅小事乘之

耕根車耕籍用之青質蓋三重餘如玉輅

安車一名進賢車臨幸用之金飾重輿曲壁八鑾在

衡紫油纁朱裏幟朱絲絡網駕赤騮朱鞶纓

四望車一名明遠車拜陵臨弔則用之金飾青油纁

朱裏通幟駕牛餘同安車

涼車省方及罷獵並用之赤質金塗銀裝五綵龍鳳

織藤油壁緋條蓮座駕以橐駝

輦用人挽本宮中所乘唐高宗始制七輦周官巾車有
輦以人組挽之太平冊禮皇帝御輦

大鳳輦赤質頂有金鳳壁畫雲氣金翅前有軾下有

構欄絡帶皆繡雲鳳銀梯主輦八十人

大芳輦

仙游輦

小輦永壽節儀皇太后乘小輦

芳亭輦黑質幕屋緋欄皆繡雲鳳朱綠夾窗花板紅

網兩簾四竿銀飾梯主輦百二十人

大玉輦

小玉輦

逍遙輦常用之椽屋赤質金塗銀裝紅條輦官十二

人春夏緋衫秋冬素錦服

平頭輦常行用之制如逍遙無屋冊承天皇太后儀

皇太后乘平頭輦

步輦聖宗統和三年駐蹕土河乘步輦聽政

羊車古輦車赤質兩壁龜文鳳翅緋幃絡帶門簾皆

繡瑞羊畫輪駕以牛隋易果下馬童子十八人服

繡瑞羊挽之

輿以人肩之天子用鞬絡臂縮

腰輿前後長竿各二金銀螭頭緋繡鳳欄上施錦褥

別設小牀奉輿十六人

小輿赤質青頂曲柄緋繡絡帶制如鳳輦而小上有

御座奉輿二十四人

皇太子車輅

金輅從祀享正冬大朝納妃用之冊皇太子儀乘黃

令陳金輅皇太子升降金輅

輶車五日常朝享宮臣出入行道用之金飾紫幃朱

裏駕一馬

四望車弔臨用之金飾紫油纒通幟駕一馬

遼史卷五十五

德陽劉子雄校字
成都方守道覆校

遼史卷五十六

元中書右丞相總裁托克托等修
志第二十五

儀衛志二

國服

上古之人網罟禽獸食肉衣皮以儷鹿韋掩前後謂之
鞞然後夏葛冬裘之製興焉周公陳王業七月之詩至
於一日于貉三月條桑八月載績公私之用由是出矣
契丹轉居薦草之間去邃古之風猶未遠也太祖仲父
蘇^原吟^述以約尼^原遙^輦氏裕悅^原于越^于之官占居黃河決
壤始置城邑為樹藝桑麻組織之教有遼王業之隆其
亦肇迹於此乎太祖帝北方太宗制中國紫銀之鼠羅
綺之筐襜載而至纖麗奕毳被土綱木於是定衣冠之

制北班國制南班漢制各從其便焉詳國服以著厥始云

祭服遼國以祭山為大禮服飾尤盛

大祀皇帝服金文金冠白綾袍紅帶縣魚三山紅垂飾犀玉刀錯絡縫烏鞞

小祀皇帝硬帽紅縹絲龜文袍皇后戴紅帕服絡縫紅袍縣玉佩雙同心帕絡縫烏鞞

臣僚命婦服飾各從本部旗幟之色

朝服太祖丙寅歲即皇帝位朝服衷甲以備非常其後行色克色哩原作瑟瑟禮大射柳即此服聖宗統和元年冊

承天皇帝太后詔三品以上用漢法服三品以下用大射柳之服

皇帝服實魯袞原作實里薛袞冠絡縫紅袍垂飾犀玉帶錯

絡縫鞞謂之國服袞冕太宗更以錦袍金帶

臣僚戴瓊冠金花為飾或加珠玉翠毛額後垂金花

織成夾帶中貯髮一總或紗冠制如烏紗帽無簷

不擬雙耳額前綴金花上結紫帶末綴珠服紫窄

袍繫鞞鞞帶以黃紅色條裏革為之用金玉水晶

錠石綴飾謂之盤紫太宗更以錦袍金帶會同元

年羣臣高年有爵秩者賜之

公服謂之展裏著紫興宗重熙二十二年詔八房族巾

幘道宗清寧元年詔非勳戚之後及額爾奇木原作夷

副使并承應有職事人不帶巾

皇帝紫阜幅巾紫窄袍玉束帶或衣紅襖臣僚亦幅

巾紫衣

常服

宰相中謝儀帝常服高麗使人見儀臣僚便衣謂之
盤裏綠花窄袍中單多紅綠色貴者披貂裘以紫
黑色爲貴青次之又有銀鼠尤潔白賤者貂毛羊
鼠沙狐裘

田獵服

皇帝幅巾擐甲戎裝以貂鼠或鵝項鴨頭爲扞腰蕃

漢諸司使以上并戎裝衣皆左衽黑綠色

弔服太祖叛弟埒克原作刺哥等降素服受之

素服乘赭白馬

漢服

黃帝始制冕冠章服後王以祀以享夏收殷尋周
弁以朝冠端以居所以別尊卑辨儀物也厥後唐以冕
冠青衣爲祭服通天絳袍爲朝服平巾幘袍襪爲常服

大同元年正月朔太宗皇帝入晉備法駕受文武百官
賀于汴京崇元殿自是日以爲常是年北歸唐晉文物
遼則用之左右采訂撫其常用者存諸篇
祭服終遼之世郊邱不建大裘冕服不書

衮冕祭祀宗廟遣上將出征飲至踐阼加元服納后
若元日受朝則服之金飾垂白珠十二旒以組爲
纓色如其綬鞋纁充耳玉簪導元衣纁裳十二章
入章在衣日月星龍華蟲火山宗彝四章在裳藻
粉米黼黻衣襟領爲升龍織成文各爲六等龍山
以下每章一行行十二白紗中單黻領青襟襪裾
鞞革帶大帶劔佩綬烏加金飾元日朝會儀皇帝
服衮冕

朝服乾亨五年聖宗冊承天太后給三品以上法服雜

禮冊承天太后儀侍中就席解劔脫履重熙五年尊號冊禮皇帝服龍袞北面臣僚並朝服蓋遼制會同中太后北面臣僚國服皇帝南面臣僚漢服乾亨以後大禮雖北面三品以上亦用漢服重熙以後大禮並漢服矣常朝仍遵會同之制

皇帝通天冠諸祭還及冬至朔日受朝臨軒拜王公元會冬會服之冠加金博山附蟬十二首施珠翠黑介幘髮纓翠綾玉若犀簪導絳紗袍白紗中單襖領朱襪裙白裙襦絳蔽膝白假帶方心曲領其革帶佩劔綬鞮烏若未加元服則雙童髻空頂黑介幘雙玉導加寶飾元日上壽儀皇帝服通天冠絳紗袍

皇太子遠遊冠謁廟還宮元日冬至朔日入朝服之

三梁冠加金附蟬九首施珠翠黑介幘髮纓翠綾犀簪導絳紗袍白紗中單卓領襖裙白裙襦白假帶方心曲領絳紗蔽膝其革帶佩劔綬鞮烏與上同後改用白鞮黑烏未冠則雙童髻空頂黑介幘雙玉導加寶飾冊皇太子儀皇太子冠遠遊服絳紗袍

親王遠遊冠陪祭朝饗拜表大事服之冠三梁加金附蟬黑介幘青綾簪導絳紗單衣白紗中單卓領襖裙白裙襦革帶鈎鞮假帶曲領方心絳紗蔽膝鞮烏劔佩綬二品以上同

諸王遠遊冠三梁黑介幘青綾

三品以上進賢冠三梁寶飾

五品以上進賢冠二梁金飾

九品以上進賢冠一梁無飾

七品以上去劍佩綬

八品以下同公服

公服勘箭儀閣使公服繫履遼國常用公服矣

皇帝翼善冠朔視朝用之柘黃袍九環帶白練裙襦

六合鞞

皇太子遠遊冠五日常朝元日冬至受朝服絳紗單

衣白裙襦革帶金鈎鶻假帶方心紛鞞囊白鞮烏

皮履

一品以下五品以上冠幘纓簪導謁見東宮及餘公

事服之絳紗單衣白裙襦革帶鈎鶻假帶方心鞮

履紛鞞囊

六品以下冠幘纓簪導去紛鞞囊餘並同

常服遼國謂之穿執起居禮臣僚穿執言穿鞞執笏也

皇帝柘黃袍衫折上頭巾九環帶六合鞞起自宇文

氏唐太宗貞觀已後非元日冬至受朝及大祭祀

皆常服而已

皇太子進德冠九琪金飾絳紗單衣白裙襦白鞮烏

皮履

五品以上幘頭亦曰折上巾紫袍牙笏金玉帶文官

佩手中算袋刀子礪石金魚袋武官鞞鞮七事佩

刀刀子礪石契苾真噉厥鉞筒火石烏皮六合鞞

六品以下幘頭緋衣木笏銀帶魚袋佩鞞同

八品九品幘頭綠袍鍤石帶鞞同

德陽劉子雄校字

成都方守道覆校

遼史卷五十七

元中書右丞相總裁托克托等修志第二十六

儀衛志三

符印

約尼原作遙輦氏之世受印于回鶻至伊蘭汗原作耶朮請印於唐武宗始賜奉國契丹印太祖神冊元年梁幽州刺史來歸詔賜印綬是時太祖受位約尼原作遙輦十年矣會同九年太宗伐晉末帝表上傳國寶一金印三天子符瑞於是歸遼

傳國寶秦始皇作用藍玉螭紐六面其正面文受命于天既壽永昌魚鳥篆子嬰以上漢高祖王莽篡漢平皇后投璽殿階螭角微玷獻帝失之孫堅得于井中

傳至孫權以歸于魏魏文帝隸刻肩際曰大魏受漢傳國之寶唐更名受命寶晉亡歸遼自三國以來僭偽諸國往往模擬私製歷代府庫所藏不一莫辨眞偽聖宗開泰十年馳驛取石晉所上玉璽于中京興宗重熙七年以有傳國寶者爲正統賦試進士天祚保大二年遣傳國璽于桑乾河

玉印太宗破晉北歸得于汴宮藏隨駕庫穆宗應歷二年詔用太宗舊寶

御前寶金鑄文曰御前之寶以印臣僚宣命詔書寶文曰書詔之寶凡書詔批荅用之契丹寶受契丹冊儀符寶郎捧寶置御坐東金印三晉帝所上其文未詳

皇太后寶制未詳天顯二年應天皇后稱制羣臣上璽

綬冊承天皇太后儀符寶奉寶置皇太后坐右

皇后印文曰皇后教印

皇太子寶未詳其制重熙九年冊皇太子儀中書令授皇太子寶

印

吏部印文曰吏部之印銀鑄以印文官制誥

兵部印文曰兵部之印銀鑄以印軍職制誥

契丹樞密院契丹諸行軍部署漢人樞密院中書省漢人諸行宮都部署印並銀鑄文不過六字以上以銀硃爲色

南北王以下內外百司印並銅鑄以黃丹爲色諸稅務以赤石爲色

雙寬原作印原作雙寬原作鷲鳥之總名以爲印紐取疾速

通史卷五十七
之義行軍詔賜將帥用之道宗賜耶律仁先鷹紐印
卽此

符契

自達呼爾

原作大賀

氏八部用兵則合契而動不過刻木爲

胖合太祖受命易以金魚

金魚符七枚黃金鑄長六寸各有字號每魚左右判合
之有事以左半先授守將使者執右半大小長短字
號合同然後發兵事訖歸于內府

銀牌二百面長尺刻以國字文曰宜速又曰勅走馬牌
國有重事皇帝以牌親授使者手劄給驛馬若干驛
馬闕取它馬代法晝夜馳七百里其次五百里所至
如天子親臨須索更易無敢違者使回皇帝親受之
手封牌印郎君收掌

木契正面爲陽背面爲陰閤門喚仗則用之朝賀之禮
宣徽使請陽面木契下殿至於殿門以契授西上閤
門使云授契行勘勘契官聲喏跪受契舉手勘契同
俛興鞠躬奏內外勘契同閤門使云准勅勘契行勘
勘契官執陰面木契聲喏平身立少退近後引聲云
軍將門仗官齊聲喏勘契官云內出喚仗木契一隻
准勅付左右金吾仗行勘勘契官云合不合門仗官
云合凡再勘契官云同不同門仗官云同亦再勘契
官近前鞠躬奏勘官左金吾引駕仗勾畫都知某官
某對御勘同平身少退近後右手舉契云其契謹付
閤門使進入閤門使引聲喏門仗官下聲喏勘契官
跪以契授閤門使上殿納契宣徽使受契閤門使下
殿奉勅喚仗

木箭內箭爲雄外箭爲雌皇帝行幸則用之還宮勘箭
官執雌箭東上閣門使執雄箭如勘契之儀詳具禮
儀志

遼史卷五十七

德陽劉子雄校字
成都方守道覆校

遼史卷五十八

元中書右丞相總裁托克托等修
志第二十七

儀衛志四

帝王處則重門擊柝出則以師兵爲營衛勞人動眾豈
得已哉天下大患生於大欲不得不遠慮深防耳智英
勇傑魁臣雄藩於是乎在寓武備於文物之中此儀仗
所由設也金吾黃麾六軍之仗遼受之晉晉受之後唐
後唐受之梁唐其來也有自耶律儼陳大任舊志有未
備者兼考之遼朝雜禮云

國仗

王通氏言舜歲徧四岳民不告勞營衛省徵求寡耳遼
太祖匹馬一麾斥地萬里經營四方未嘗寧居所至樂

從用此道也太祖兼制中國秦皇漢武之儀文曰至後嗣因之旄頭豹尾馳驅五京之間終歲勤動轍迹相尋民勞財匱此之故歟遠自達呼爾原作大賀氏摩歡原作摩會受唐鼓燾之賜是為國仗其制甚簡太宗伐唐晉以前所用皆是物也著于篇首以見艱難創業之主豈必厚衛其身云

十二神燾

十二旗

十二鼓

曲柄華蓋

直柄華蓋

約尼原作遙輦末主遺制迎十二神燾天子旗鼓置太子帳前諸弟埒克原作刺哥等叛伊德實原作德實縱火焚行宮皇

后命舒古魯原作魯救之止得天子旗鼓太宗卽位置旗鼓神燾于殿前聖宗以輕車儀衛拜帝山

渤海仗

天顯四年太宗幸遼陽府人皇王備乘輿羽衛以迎乾亨五年聖宗東巡東京留守具儀衛迎車駕此故渤海儀衛也

漢仗

達呼爾原作大賀失活入朝于唐繼古原作姿固兄弟繼之尙主封王飫觀上國開元東封實古原作邵固扈從又覽太平之盛自是朝貢歲至于唐遠始祖聶咥原作涅里立約尼原作遙輦氏世為國相目見耳聞歆企帝王之容輝有年矣約尼原作遙輦致鼓燾於太祖帳前曾何足以副其雄心霸氣之所睥睨哉厥後交梁聘唐不憚勞勩至於太宗立晉以

要冊禮入汴而收法物然後累世之所願欲者一舉而得之太原擅命力非不敵席卷法物先致中京蹠棄山河不少顧慮志可知矣於是秦漢以來帝王文物盡入于遼周宋案圖更製乃非故物遼之所重此其大端故特著焉

太宗會同元年晉使馮道備車輅法物上皇太后冊禮

劉昫盧重備禮上皇帝尊號

三年上在薊州觀導駕儀衛圖遂備法駕幸燕御元和殿行入閣禮

六年備法駕幸燕迎導御元和殿

大同元年正月朔備法駕至汴上御崇元殿受文武百僚朝賀自是日以爲常

二月朔上御崇元殿備禮受朝賀

二月將幸中京鎮陽詔收鹵簿法物委所司押領先

往未幾鎮陽入漢鹵簿法物隨世宗歸于上京

四月皇太弟魯呼原作李胡遣使問軍事上報曰朝廷起

居如禮是月太宗崩世宗卽位鹵簿法物備而不

御

穆宗應歷元年詔朝會依嗣聖皇后故事用漢禮

景宗乾亨五年二月神樞升輜輳車具鹵簿儀衛

六月聖宗至于上京留守具法駕迎導

聖宗統和元年車駕還上京迎導儀衛如式

三年駕幸上京留守具儀衛奉迎

四年燕京留守具儀衛導駕入京上御元和殿百僚朝賀是後儀衛常事不復書

鹵簿儀仗人數馬匹

步行擎執二千四百一十二人坐馬擎執二百七十五人坐馬樂人二百七十三人步行教坊人七十一人御馬牽攏官五十二人御馬二十六匹官僚馬牽攏官六十六人坐馬挂甲人五百九十八人步行挂甲人百六十人金甲二人神輿十二人長壽仙一人諸職官等三百五人內侍一人引稍押衙二人赤縣令一人府牧一人府吏二人少尹一人司錄一人功曹一人太常少卿一人太常丞一人太常博士一人司徒一人太僕卿一人鴻臚卿一人大理卿一人御史大夫一人侍御史二人殿中侍御史二人監察御史一人兵部尚書一人兵部侍郎一人兵部郎中一人兵部員外郎一人符寶郎一人左右諸衛將軍三十五人左右諸折衝二十一人左右諸果毅二十八人尚乘奉御二人排仗承直二人

左右夾騎二人都頭六人主帥一十四人教坊押纛二人左右金吾四人虞候伙飛一十六人鼓吹令二人漏刻生二人押當官一人司天監一人令史一人司辰一人統軍六人千牛備身二人左右親勳二人左右郎將四人左右拾遺二人左右補闕二人起居舍人一人左右諫議大夫二人給事中書舍人二人左右散騎常侍二人門下侍郎二人中書侍郎二人鳴鞭二人內侍中一人中書令一人監門校尉二人排列官二人武衛隊正一人隨駕諸司供奉官三十人三班供奉官六十人通事舍人四人御史中丞二人乘黃丞二人都尉一人太僕卿一人步行太卜令一人職官乘馬三百四匹進馬四匹駕車馬二十八匹人之數凡四千二百三十有九馬之數凡千五百二十得諸本朝太常卿徐世隆

家藏遼朝雜禮者如是至於儀注之詳不敢傳會云

遼史卷五十八

德陽劉子雄榜字
成都方守道覆校

遼史卷五十九

元中書右丞相總裁托克托等修
志第二十八

食貨志上

契丹舊俗其富以馬其疆以兵縱馬於野弛兵於民有事而戰曠騎介夫卯命辰集馬逐水草人仰漣酪挽強射生以給日用糗糧芻茭道在是矣以是制勝所向無前及其有國內建宗廟朝廷外置郡縣牧守制度日增經費日廣上下相師服御浸盛而食貨之用斯爲急矣於是五京及長春遼西平州置鹽鐵轉運度支錢帛諸司以掌出納其制數差等雖不可悉而大要散見舊史若農穀租賦鹽鐵貿易坑冶泉幣羣牧逐類採摭緝而爲篇以存一代食貨之略初皇祖伊德實原作勻爲大

德將原作府額爾奇木原作夷喜稼穡善畜牧相地利
以教民耕仲父蘇嚙原作為裕悅原作飭國人樹桑麻
習組織太祖平諸弟之亂弭兵輕賦專意於農嘗以戶
口滋繁糺轄疏遠分北達寧額原作大為二部程以樹
藝諸部效之太宗會同初將東獵三剋奏減輜重疾趨
北山取物以備國用無害農務以烏爾古原作之地水
草豐美命鄂勒歡原作錫林原作居之益以哈里原作
水之善地為農田三年詔以嘉哩原作河臚胸河近地
賜南院鄂津特埒哩原作伊遜巴勒原作乙北院烏
納哈喇原作三錫林原作人以事耕種尋詔有司勸
農桑教紡績八年駐蹕赤山宴從臣問軍國要務左右
對曰軍國之務愛民為本民富則兵足兵足則國疆上
深然之是年詔徵諸道兵仍戒敢有傷禾稼者以軍法

論應歷間雲州進嘉禾時謂重農所召保寧七年漢有
宋兵使來乞糧詔賜粟二十萬斛助之非經費有餘其
能若是聖宗乾亨五年詔曰五稼不登開帑藏而代民
稅螟蝗為災罷徭役以恤饑貧帝常過藁城見伊實原作
室原作威原作奧原作隗原作部下婦人迪輦等黍過熟未獲遣人助刈太
師韓德讓言兵後遺民棄業禾稼棲畝募人獲之以半
給獲者政事令室昉亦言山西諸州給軍興民力凋敝
田穀多躡於邊兵請復今年租六年霜旱災民饑詔三
司舊以稅錢折粟估價不實其增以利民又徙濟必原作
避寨居民三百戶於檀順薊三州擇沃壤給牛種穀十
三年詔諸道置義倉歲秋社民隨所獲戶出粟痔倉社
司籍其日歲儉發以振民統和十五年詔免南京舊欠
義倉粟仍禁諸軍官非時畋收妨農開泰元年詔曰朕

惟百姓徭役煩重則多給工價年穀不登發倉以貸田園蕪廢者則給牛種以助之太平初幸燕燕民以年豐進土產珍異上禮高年惠鰥寡賜酺連日九年燕地饑戶部副使王嘉請造船募習海漕者移遼東粟餉燕議者稱道險不便而寢興宗卽位遣使閱諸道禾稼是年通括戶口詔曰朕於早歲習知稼穡力辦者廣務耕耘罕聞輸納家食者全虧種植多至流亡宜通檢括普爲均平禁諸職官不得擅造酒糜穀有婚祭者有司給文字始聽道宗初年西北兩穀三十里春州斗粟六錢時西蕃多叛上欲爲守禦計命耶律唐古督耕稼以給西軍唐古率眾田臚胸河側歲登上熟移屯鎮州凡十四稔積粟數十萬斛每斗不過數錢以馬人望前爲南京度支判官公私兼裕檢括戶口用法平恕乃遷中京度

支使視事半歲積粟十五萬斛擢左散騎常侍遼之農穀至是爲盛而東京如咸信蘇復辰海同銀烏遂春泰等五十餘城內沿邊諸州各有和糴倉依祖宗法出陳易新許民自願假貸收息二分所在無慮二三十萬石雖累兵興未嘗用乏迨天慶間金兵大入盡爲所有會天祚播遷耶律迪里原作敵烈等逼立梁王雅里令羣牧人戶運鹽灤倉粟人戶侵耗議籍其產以償雅里自定其直粟一車一羊三車一牛五車一馬八車一駝從者曰今一羊易粟二斗尙不可得此直太輕雅里曰民有則我有若今盡償眾何以堪事雖無及然使天未絕遼斯言亦足以收人心矣夫賦稅之制自太祖任韓延徽始制國用太宗籍五京戶丁以定賦稅戶丁之數無所於考聖宗乾亨間以上京雲威原作雲爲戶貲其實饒善避繇

役遺害貧民遂勒各戶凡子錢到本悉送歸官與民均
差統和中耶律昭言西北之眾每歲農時一夫偵候一
夫治公田二夫給糶官之役當時沿邊各置屯田戍兵
易田積穀以給軍饗故太平七年詔諸屯田在官斛粟
不得擅貸在屯者力耕公田不輸稅賦此公田制也餘
民應募或治閒田或治私田則計畝出粟以賦公上十
五年募民耕灤河曠地十年始租此在官閒田制也又
詔山前後未納稅賦並於密雲燕樂兩縣占田置業入
稅此私田制也各部大臣從上征伐俘掠人戶自置郭
郭爲頭下軍州凡市井之賦各歸頭下惟酒稅赴納上
京此分頭下軍州賦爲二等也先是遼東新附地不權
酤而鹽麩之禁亦弛馮延休韓紹勳相繼商利欲與燕
地平山例加繩約其民病之遂起大延琳之亂連年詔

復其租民始安靖南京歲納三司鹽鐵錢折絹大同歲
納三司稅錢折粟開遠軍故事民歲輸稅斗粟折五錢
耶律穆濟原作抹只守郡表請折六錢亦皆利民善政也

遼史卷五十九

德陽劉子雄校字
成都方守道覆校

遼史卷六十

元中書右丞相總裁托克托等修
志第二十九

食貨志下

征商之法則自太祖置羊城於炭山北起榷務以通諸道市易太宗得燕置南京城北有市百物山衛命有司治其征餘四京及它州縣貨產懋遷之地置亦如之東平郡城中置看樓分南北市禺中交易市北午漏下交易市南雄州高昌渤海亦立互市以通南宋西北諸部高麗之貨故女直以金帛布蜜蠟諸藥材及鐵离鞞鞞伊濟原作于厥等部以蛤珠青鼠貂鼠膠魚之皮牛羊駝馬毳罽等物來易於遼者道路繼屬聖宗統和初燕京留守司言民艱食請弛居庸關稅以通山西糴易又令有

司論諸行宮布帛短狹不中尺度者不粥於市明年詔
以南北府市場人少宜率當部車百乘赴集開奇峯路
以通易州貿易二十三年振武軍及保州並置權場時
北院大王耶律實嚙原作室魯以俸羊多闕部人貧乏請以
羸老之羊及皮毛易南中之絹上下爲便至天祚之亂
賦斂既重交易法壞財日匱而民曰困矣鹽筴之法則
自太祖以所得漢民數多卽入部中分占漢城別爲一
部治之城在炭山南有鹽池之利卽後魏滑鹽縣也入
部皆取食之及征幽薊還次于和拉原作鶴刺灤命取鹽給
軍自後灤中鹽益多上下足用會同初太宗有大造於
晉晉獻十六州地而瀛莫在焉始得河間煮海之利置
權鹽院於香河縣於是燕雲迤北暫食滄鹽一時產鹽
之地如渤海鎮城海陽豐州陽洛城廣濟湖等處五京

計司各以其地領之其煎取之制歲出之額不可得而
詳矣坑冶則自太祖始併室韋其地產銅鐵金銀其人
善作銅鐵器又有哈準原作曷木部者多鐵曷木國語鐵也
部置三冶曰柳濕河曰賽音楚古爾蘇原作三熱古斯曰手山
神冊初平渤海得廣州本渤海鐵利府改曰鐵利州地
亦多鐵東平縣本漢襄平縣故地產鐵卅置採煉者三
百戶隨賦供納以諸坑冶多在國東故東京置戶部司
長春州置錢帛司太祖征幽薊師還次山麓得銀鐵卅
命置冶聖宗太平間於潢河北陰山及遼河之源各得
金銀卅興冶採煉自此以訖天祚國家皆賴其利鼓鑄
之法先代色勒迪原作撒刺的爲額爾奇木原作夷离堇以土產
多銅始造錢幣太祖襲而用之遂致富彊以開帝業太
宗置五冶太師以總四方錢鐵石敬瑭又獻沿邊所積

錢以備軍實景宗以舊錢不足於用始鑄乾亨新錢錢
用流布聖宗鑿大安山取劉守光所藏錢散諸五計司
兼鑄太平錢新舊互用由是國家之錢演迤域中所以
統和出內藏錢賜南京諸軍司開泰中詔諸道貧乏百
姓有典質男女計備價曰以十文折盡還父母每歲春
秋以官錢宴饗將士錢不勝多故東京所鑄至清寧中
始用是時詔禁諸路不得貨銅鐵以防私鑄又禁銅鐵
賣入回鶻法益嚴矣道宗之世錢有四等曰咸雍曰太
康曰大安曰壽隆皆因改元易名其肉好銖數亦無所
考第詔楊遵勛徵戶部司逋戶舊錢得四十餘萬繼拜
樞密直學士劉伸爲戶部使歲入羨餘錢三十萬繼擢
南院樞密使其以災沴出錢以振貧乏及諸宮分邊戍
人戶是時雖未有貫朽不可較之積亦可謂富矣至其

末年經費浩穰鼓鑄仍舊國用不給雖以海雲佛寺千
萬之助受而不拒尋禁民錢不得出境天祚之世更鑄

乾統天慶二等新錢而上下窮困府庫無餘積始太祖

爲德略

原作府額爾奇木

原作夷

也懲約尼

原作

氏單

弱於是撫諸部明賞罰不妄征討因民之利而利之羣
牧蓄息上下給足及卽位伐河東下代北郡縣獲牛羊

馳馬十餘萬樞密使耶律色珍

原作

斜軫討女直復獲馬二

十餘萬分牧水草便地數歲所增不勝算當時括富人
馬不加多賜大小鶻軍萬餘匹不加少蓋蓄牧有法然

也咸雍五年蕭托輝

原作

陶隗爲馬羣太保上書猶言羣牧

名存實亡上下相欺宜括實數以爲定籍厥後東丹國
歲貢千匹女直萬匹直不古等國萬匹準布

原作

阻卜及武

都溫

原作

獨婉

特哩袞

原作

惕隱各二萬匹西夏室韋各三百

匹伊埒圖

原作越里篤

博和哩

原作訃阿里

鄂羅木

原作奧里米

富珠

哩

原作蒲奴里

鐵驪等諸部三百匹仍禁朔州路羊馬入宋

托歡

原作吐渾

党項馬鬻於夏以故羣牧滋繁數至百有餘

萬諸司牧官以次進階自太祖及興宗垂二百年羣牧之盛如一日天祚初年馬猶有數萬羣每羣不下千匹祖宗舊制常選南征馬數萬匹牧于雄霸清滄間以備燕雲緩急復選數萬給四時遊畋餘則分地以牧法至善也至末年累與金戰番漢戰馬損十六七雖增價數倍竟無所買乃冒法買官馬從軍諸羣牧私賣日多畋獵亦不足用遂爲金所敗棄衆播遷以訖于亡松漠以北舊馬皆爲達實

原作大石

林牙所有遼之食貨其可見者

如是耳至於鄰國歲幣諸屬國歲貢土宜雖累朝軍國經費多所仰給然非本國所出況名數已見本紀茲不

復載夫冀北宜馬海濱宜鹽無以議爲遼地半沙磧三時多寒春秋耕穫及其時黍稌高下因其地蓋不得與中土同矣然而遼自初年農穀充羨振饑恤難用不少靳旁及鄰國沛然有餘果何道而致其利歟此無他勸課得人規措有法故也世之論錢幣者恆患其重滯之難致鼓鑄之弗給也於是楮幣權宜之法興焉西北之通舟楫比之東南十纔一二遼之方盛貨泉流行國用以殷給戍賞征賜與億萬未聞有所謂楮幣也又何道而致其便歟此無他舊儲新鑄並聽民用故也孟子曰周于利者凶年不能殺人力苟至一夫猶足以勝時災況爲國乎以是知善謀國者有道以制天時地利之宜無往而不遂其志食莫大於穀貨莫大於錢特志二者以表遼初用事之臣亦善裕其國者矣

遼史卷六十

德陽劉子雄校字
咸都方守道覆校

48-11290

